


*Gundiye*  
(*Helbestên Xortani*)



*M. Nûreddîn Yekta*

*Gundiye*  
(*Helbestên xortani*)



*M. Nûreddîn Yekta*





## ***Rojbaş gelî xwendevanan!***

*Wek min di helbestekî xwe da gotiye ku.*

*"Ne şair im ne dengbêj im*

*Te hiş birî ez kerr û gêj im*

*Hêsrên ji çavên xwe direjim*

*Hêsrêmin ji bo te dibarin."*

*ez şair û helbestvan nînim, lê ji zaroktiya xwe da ta îro  
carnan min çend rêzan nivîsandîye dişibuhun helbestan û  
min xwest ku ev rêzana wenda nebin, dibe ku hin kesên wek  
min helbestvan nebin kêfa wan jê ra were.*

*Boy vê tîka min ji xwendevanên şair û helbestvan heye ku  
kêmasiyên min bi temamî qebûl bikin.*

*Xort û keçên me yê evîndar jî hewna xwe pê binin.*

*Em îro di demek xeter da dijîn, zimanê me li ber têkçûyîne ye.*

*Gerek em bi zimanê xwe binvîsînin û bixûnin. Kê zêde, şaş  
an rast ne girîng e, lewra bi zimanê me ye. Ziman wek şîrê  
dayikê mirov helal e û şêrîn e!*

*Her tişt boy vî zimanê şêrîn û boy azadiya gelê me!*

*M. Nûreddîn Yekta*

## *Avên Derya*

### *Avên derya çawa şêrîn dibin?*

*Rojek hemî zanyarên fizîkê civîyabûn  
Digotin avên cîhanê yên şêrîn  
roj bi roj kêr dibin,  
roj hebe wê avên vexwarinê nemînin,  
cîhan wê çi bike?*  
*Hinekên gotin em formîlekê  
ji boy avê behra bibînin,  
ka em çawa dikarin van avana şêrîn bikin.  
Lewra avên derya hemî tûj in!..  
Liser avakîrîna santrala û  
parzûnkîrîna avên tûj gelek nîqaş kîrin  
lê mesref gelek li jor bû.  
Hinekên gotin emê avên baranê bicivînin  
li dewletan belavkî.  
Lê hinekên gotin va ne mimkî e,  
lewra ava baranê têr naqê him jî  
mesrefek giran e!  
Min destê xwe bilindkîr û got  
"Ezê ji we ra formîlek hêsan bibînim."  
Gotin çawa?  
Min got  
"Gula min carek tûyê avên behra bike  
wê hemî şêrîn bibin."*

## *Ax kôçerê*

*Heywax li min heywax li min heywax li min ax kôçerê  
Ezê bi xûlama bejna bilind çepilên dirêj dev û lêvên şeqîrî  
çav û biriyên te dîlberê*

*Dîlber qûrba iro bîst û yekê adarê ezê rabim ji bo xatirê te  
aqirê newrozê dadim  
Tûyê wisa dilê min da şîrînî ezê te bi rûhû canê xwe jî nadim  
Roja destê min û delalîka dilê min ji hev qetîya ji wê rojê  
şûnva min zanîbû ezê li vê dunê bê meqsed û bê mirad im.  
Heywax li min ax kôçerê*

*Heywax li min heywax li min heywax li min ax kôçerê  
Ezê bi xûlama bejna bilind çepilên direj dev û lêvên şeqîrî  
çav û biriyên te dîlberê*

*Dîlber qurba îro pêncê me temam bû minê têlê li ser têlê dida  
Ez nizamim kêwa min li kû ye bata serê, minê jê re derdê dilê  
rezîl bigota pê ra xêber bida  
Mal şewitîyê qey tû nizanî piştî çav û biriyên reş û belek  
bejna zirav li welatê xerîb ezê ji xwe ra êsîr mame dî  
qampêda  
Heywax li min ax kôçerê*

*Ax heywax li min heywax li min ax qoçerê  
Ezê bi xûlama bejna bilind çepilê dirêj dev û lêvên şekîrî  
çav û biriyên te dîlberê*

*Ezê bi xûlama bejna bilind çepilê dirêj dev û lêvên şekîrî her  
du çavên qehwe rengî  
Mal şewitîyê sala îsal liser te har û dîn bûmê, bûme bengî  
Tû yê were ezê destê te bigirim birevînim gava tu neyê edî  
îdara min nabe ezê dunya alemê da  
bêjim lê bikîm dengî  
Heywax li min ax qoçerê*

*Ax heywax li min heywax li min ax qoçerê  
Ezê bi xûlama bejna bilind çepilê dirêj dev û lêvên şekîrî  
çav û biriyên te dîlberê*

## ***Bê aqil***

*Dema mirov bê aqil be  
Herkes mirovê dixapîne  
Mirov xweyê sozê xwe be  
Xelk ji mirov re dibên dîn e*

*Rastî îro pere nake  
Ku merif ji xelkê bawerke  
Ewê kêfa xwe bi te bike  
Paşê piştî xwe bi te da ke*

*Ewê her du yan dixapand  
Serî li her du ya digerland  
Bi dev bi mêrê xwe re kenî  
Ji dost re jî çav diniqand*

*Soz tuneke ji bo mêra  
Ji jina bigre dost û yara  
Ku tu bi xwazî rast be bi te ra  
Wê çewa xwar be ji mêrê xwe ra*

*Ecêp mam ji bona gundîyê  
Ku wê bibim ser hêwiyê  
Dema ku min ewê naskir  
Min dît dil ketime êzdiyê!*



## *Bê bextê*

*Xwezî min ji te hez ne kîra!  
Bi dilê rast bi ruh û can!  
Stûxwar hîştîm li ber dîwara,  
Ji xwe re dikî kêf û seyran!  
    Dev bi girî dil bi xwîn im,  
    Wekî bilbil ez dixwînim,  
    Îro sê rojê min tamam,  
    Ez digêrim te nabînim!  
Li ber min digirî li derva dike nî!  
Min nizanî tu ewqas bi fenn î,  
Evîndarê bejna te me,  
Gelo çima min dixapî nî?  
    Ez aşîqê te me bi rastî,  
    Te kêr gîhandîye hestî,  
    Min qiyamet bi çavan dî,  
    Ku min ji te hezkîr bi stûyê şîkêstî.*

*Tu şîrînî wek şerbetê,  
Min bi çavan dît û dil ketê,  
Perîşan im li cîhanê,  
Ji ber sozê te bê bextê!  
    Îdî li te nakîm silavê,  
    Li te çav reşê bejin ziravê,  
    Bese idî min nexapîne!  
    Ax zalimê xayîn bavê.*

## ***Bê îmanê***

*Delal qurba dema min te dibînim ez li jor im tu li jêr î were lê  
lê were lê lê*

*Şewq û şemala te da der û dora, wekî hîva çardeşevî derkeve  
ji bin ewrê reş û tarî were lê lê were lê lê*

*Tîna eşqa te ez şewitandim ez kirim wekî xwelî û wekî arî  
were lê lê were lê lê*

*Min dît kêla min rabû dikim derêm ber derî, bikim qêrîn  
hewar û zarîn were lê lê were lê lê*

*Lê zalîma qîza zalîma roja min tu dîtî heya îro te ez nexweş  
xistim kirim nava dest û piya, ez birindar im, bûm weka peza  
guraxwarî were lê lê were lê lê*

*Dîlber qurba tu nizanî îşev çi qewimî lê çi ciriya were lê lê  
were lê lê*

*Minê di xewa xweda destê kêwa digirt emê digeriyan li  
daristana lê li nav devîya were lê lê were lê lê*

*Emê bi hevra diketin gilî û gazin û kêf henek û laqirdiya  
were lê lê were lê lê*

*Dema min çaven xwe ji xewa şêrîn vekir, min dî ez birindar  
im wekî gurê serê çiya were lê lê were lê lê*

*Dilber qurba bidî xatirê Xwedê û pêyxemberan were destê  
xwe li nava destên min xê, ezê te birevînîm bavêjim deşta  
Mûşê Nehya ziyaretê vê kavla Xeybiya were lê lê were lê lê  
Ax zalîmê êdî bese were ji ber eşqa te ez nexweş im goştê  
canê min heliya were  
lê lê were lê lê*

*Dûlber heyra li vê demê li vê dewranê were lê lê were lê lê  
Ezê li ser danzde dewletên avrupayê digeriyam, dewlet  
dewlet li cîhanê were lê lê were lê lê  
Minê dûv ra xwe berdida welatê şêrîn, ax lê Kurdistanê were  
lê lê were lê lê  
Ezê bajar bajar digeriyam ji Mersînê lê heyra Wanê lê lê were  
lê lê  
Minê dûvra xwe berdabû bajarokan ji Tarsûsê lê ta Tetwanê  
lê lê were lê lê  
Dikim nakim kewra xwe nabînim minê xwe berda gund bi  
gund digeriyam ji Xeybiya Ta Ewranê lê lê were lê lê  
Gelî heval û hogiran ez dikarim ji we ra sonda temam sond  
bixum roja dunya ava bûye heyra roja qiyametê roja axirê  
zemanê were lê lê were lê lê  
Tu were cara nahatiye ruyê dine yeqa weqa vê zalimê Bê  
îmanê were lê lê were lê lê  
(Bêja Şehribanê an Bêrîvanê jî lê tê: Tu were cara nahatiye  
ruyê dine yeqa weqa vê zalimê (şehribanê-Berîvanê) were lê  
lê were lê lê)*

## **Bek**

*Bek bek bek bek!*

*Bese fesadiyê nek!*

*Bek dewa çî li me dik?*

*Xwedê malê xirab bik.*

*Bek bû fesadê dunê,*

*Çi-dxwaze ji me, Mem û Zînê?*

*Kurro-m evîndarê hev in!*

*Xwedê çavê te birjîne!*

*Ez Mecnûn im ew Leyla ye,*

*Bek li serê me bela ye,*

*Bese bê şerefi nek!*

*Xayîni ka ji kê re maye?*

*Zîna min li malê rûniştî,*

*Ji tirsê çok lê şikestî!*

*Bek fesadiya xwe kir,*

*Wekî kûçik bi me geztî!*

*Bê hiş im nizam çî bêjim?*

*Dikim ku Bek bikujim!*

*Ji bo xatirê bejna zirav,*

*Li rûyê erdê xwîn birêjim!*

*Çiqas kûçikê dunê hene!*

*Bela serê min û te ne!*

*Xwedê bi me re dost û yar be!*

*Kes nikare te-j min biqetîne!*

## ***Berîvanê***

*Berîvanê tu wek kulîlkê biharê  
Na na welle tu wekî çiçekê li belgê darê  
Ez dizanim tu jî wek min jî destê qederê jî dilê xwe va  
birîndarî  
Were destê xwe li nava destê min xê te birevînim, jî te ra  
sonda tamam bixum terqê te nekîm hetta roja bîkêvim gorrê...  
eman eman Bêrîvanê...*

*Eman eman eman lê Bêrîvanê  
Mal şewitîyê te çav reşê lê reş kîldanê  
Tuyê were emê bi destê hev du bigirin xwe bavêjin ser şehîd û  
zîyaretê Kurdistanê  
Emê duakî bikî jî Xalîqê alemê Rebbê jorîn bila mirazê  
miraz xwaza biqedîne yê min û te jî li ser îmanê... eman eman  
Bêrîvanê*

*Bêrîvanê rêya zozana bişewite tev bi kerenge,  
Te îro jî bexîte min re li serê xwe girêdaye şara heft renge,  
Xelk aşîqê malê dinê ez bûm aşîqê dîlbera şox û şenge,  
Kewa gozel eşqa min û te li ser danzde dewletê Awrûpayê  
daye denge,  
Mal şewitîye qey tû nabînî terr û canîya me çû, were destê  
xwe li nava destê min xê ezê te birevînim de neseqîne rabe  
lezqê wext derenge....  
eman eman Bêrîvanê.*

## ***Bi helalî***

*Werî lê lê Werî lê lê Werî lê lê Werî lê lê Werî lê lê Werî lê lê*  
*Kubara min lê lê*

*De lê lê delalîya min go tu xezal î tu xezal î*

*Tu yê rabe keziyê dirêj bi ser soretê sorda bide alî,*

*Çav û biriyar kîl ke di ber min ra were here xwe li ba ke bi*  
*delalî*

*Mal şewitîyê ezê duaqî bikîm tu jî bêje amîn, belkî Xwedê*  
*Teala biqedîne mirazê miraz xwaza êkê min û te jî lê bi*  
*helalî,*

*Xwezî bi wî çaxê min bidîya ku ez bibim malxwê malê tu jî,*  
*ji min ra bibî bermalî..*

*Werî lê lê Werî lê lê Werî lê lê Werî lê lê Werî lê lê Werî lê lê*  
*delalîya min lê lê*

*Werî lê lê Werî lê lê Werî lê lê Werî lê lê Werî lê lê Werî lê lê*  
*Kubara min lê lê*

*Kewa gozel ca binhêre Kurdistan'a rengîn xemilîye bi van*  
*dara*

*Were emê bi destên hevdu bigrin biçin çiyayê Şerefdînê*  
*derkevin zozan û wara,*

*Bila bê guhê me dengê bilûrvan û şivan û gavana barîne berx*  
*û kara,*

*Ka wer ji min re bêje wê çawabe halê me stuxwara....*

*Werî lê lê Werî lê lê Werî lê lê Werî lê lê Werî lê lê Werî lê lê*  
*delalîya min lê lê*

Werî lê lê Werî lê lê Werî lê lê Werî lê lê Werî lê lê Werî lê lê  
delaliya min lê lê  
Delal qurba ez diqim naqim nizanîm tu çima qet fêh naqî,  
Tuyê ketî xewa mirinê ewan herdu çavên belek ji xew venaqî  
Porrê dirêj li ser mila belav bûne tu çima qet şeh naqî  
Vay ez ketim sekerata mirinê ji bo xatirê çavên belek, li vî  
derdî çare naqî  
Werî lê lê Werî lê lê Werî lê lê Werî lê lê Werî lê lê Werî lê lê  
delaliya min lê lê

## ***Bi hezaran***

*Silav lite bi hezaran  
Bi qasî qûm û belgê daran  
Ne rojekê timî caran  
Tu dîlxweş bî delala min*

*Bi roj û şevan ez digirim  
Wek mirovek lal û kerr im  
Rê nabînim têda herim  
Ji boy te werim xezala min*



## ***Biba bihar***

*Xwezî dîsa biba bihar li me  
Min bidîya dara belgên xwe vekîra  
Der û cînar derketina zozana  
Min dîsa bidîya wê kêça macira*

*Ba bihata baran pê re bibariya  
Berîvan bi hev re biçûna bêrya miya  
Nura min bi keta navê tê da bi meşiya  
Min carek bi çavên serê xwe bidîya*

*Minê bi desta bi girta emê bireviyan  
Bi geriyana li serê av û çavkaniya  
Runiştina li bin sîyên darên bîya  
Me bikîra kêf henek û laqirdîya*

*Dûr im destê min nagîje yarê  
Hêsrê-m dibarin wekî taviyê biharê  
Nav û dilê min bi hev re hatin xwarê  
Kes destê min nagire nagîhîne wê koçerê*

*Li welatê xerîb ji kewa ez kewê nêr im  
Li serê deşt û çiya ez di çêrim  
Nikarim bêjim ji lomê xelkê ez newêrim  
Qey dizanin ez aşiqê kêça taxa jêr im*

## ***Bibim Bilbil***

*Ci bêjim ku tu fêm bikî  
ji derdê dilê min îro  
bûm wek dareka îşk di payîzê de  
li benda barana te me ku bibarî  
dîsa zindî bibim belg û çîçekan vekim.  
Ku bibim dareka hêşin  
bi çiq û belgan bixemilim  
gelo tu bibî çivîkek  
weri liser min deyni?  
te qet xwest rojekê ku bibî çûçik  
bihewakevî bifirî cîkî dûr  
bo silavek li yarê  
Lê ez?  
Na welleh naqxwazim bibim çûçik  
lê dixwazim bibim bilbilek  
bifirim bi alî te va  
deynim liser çiqê dara gulê  
bixûnim şev û rojan  
lewra ez evîndarê gulê me  
evîndarê te  
serxweş bibim bi bîhna baqê gulan  
bi mêvaniya çend saetan  
di ber sing û berê te da  
ez eva me gula min ka çi dibêjî?  
Dîn im an bê hiş?  
diber evîna te ya wek çîçekê belg nevekîrî*

## ***Bibuhure***

*Ez insaneke kerr û lal im  
Min ne zar e, ne ziman e  
Ez hez dikim ji dilbereke  
Ez pîr bûme ew jî cane*

*Ew e ruhî û ew e jîyan  
Ew bi kêf ez weke miriyan  
Zanim gunê dilê min tune  
Lê qebahet her yê çavan*

*Zanim ku tu weke hortî î  
Lê ez ketim defika te  
Nexweşim ji eşqa dûriyê  
Çibikim bê bext bê şefqet e*

*Ka bêj ji min re suçê min çi ne  
Ji bo Xwedê ez perîşan im  
Ger suçê min ji te hezkirîn e  
Bibuhure ez nezan im!*

## *Bihara jiyane*

*Dilber canê Şerefdîn bişewite wa bi mij e  
Te bihara jiyana min bir ewrê kalîyê bi ser min da guje guje  
Bê bextê te rojê heft cara digot „ez ya te me were min  
birevîne an bikuje“*

*Gelo tu çima poşman bûy te ez kirim dîn û harek kerrû gêje  
Xwedê xirab bike karê evî dunya çiqas pis û ewqas qirêj e*

*Herçî kesên bûn sedemê min û kewa gozel belkî Xwedê ezîzê  
ber dilê wan bikuje,  
Ax herdû çavên wan birêje*

## *Bîlgînê min lawo*

*Lawo lawo lawo lawo lawo lawo lawo lawo lawo lawo*

*Bîlgînê min lawo*

*Qula xortê terr û can zavê dest bi hine bûqa rû bi xêlê di dilê  
diya te da mayo*

*Lawo lawo lawo lawo lawo lawo lawo lawo lawo lawo*

*Bîlgînê min lawo*

*Bîlgînê min çek û rextê xwe girêda derket serê çiya ji bo daw  
û doza me Kurda wo*

*Qula Xwedê bikeve derê dijmin û fesad û cehş û van  
xayînawo*

*Li çiyayê Bitlîsê dor li Bîlgînê min girtin bi tevî leşkerê tirk û  
van romiyawo*

*Çawa bedena terr û taze dane ber top û tanga ber gulawo*

*Bîlgînê min serê meha Hezîranê ketî nava refê şehîdawo*

*Lawo lawo lawo lawo lawo lawo lawo lawo lawo lawo*

*Bîlgînê min lawo*

*Qula xortê terr û can zavê dest bi hine bûqa rû bi xêlê di dilê  
diya te da mayo*

*Gelî gundî malî cîrana gazin û loma ji min nekîn dilê min bi  
kûl û bi birîn e  
Heger hunê pirsê xortê terr û can ji min dikî navê gede  
lawikê min Bilgîn e  
Çek û rextê xwe girêda derket serê çiya ji bo doza Kurdîstana  
rengîne  
Kula Xwedê bi kûl be bikeve derê fasad û cehş û vê dewleta  
roma xayîne  
Çawa bîlgînê min bi tevî hîjde hevalan va kuştin çek rextê  
wan tev da bûne xwîne  
Herçi kesê bûn sedemê kuştina Bilgînê min belkî xêrê ji ezîzê  
ber dilê xwe nebîne*

*Lawo lawo lawo lawo lawo lawo lawo lawo lawo lawo  
Bîlgînê min lawo  
Kula xortê terr û can zavê dest bi hine bûka rû bi xêlê di dilê  
diya te da mayo*



## **Bûkê**

*Ax zerîyê ax zerîyê  
Nezanê lê te gundîyê  
Roja bavê te ne li mal be  
Wê şeve tême dizîyê*

*Ax dîlberê ax lê Nûrê  
Ciya deyne li ber tendûrê  
Xwezî bi wî roja ku ez  
Bim mêhvanê te kîçerê*

*Mala Nûrê li ber çem e  
Hez kirina wê dem bi dem e  
Mizgîn ji te ra kîçerê  
Sibê ez mêhvanê te me*

*Çûma balê di nav avê da  
Millê xwe li millê wê da  
Hetta em çûne wiyalî  
Destê min nav memikê wê da*



*Bi hevra hatin ji zozanê da  
Heval çûn em man di rê da  
Hetta stêrka sivê lêda  
Devê min û wê di hev da*

*Min di paxîla xwe vekir  
Herdû memikên xuyan kir  
Min girtibû ramîsabû  
Memikê wê zare zar kir*

*Ramîsanekî dida min  
Di mala xuşka xwe da  
Bi qurbana bejna tebin  
Hecî û axa, şêx û seyda*

## **Canê Canê**

*Canê qurba min berê xwe daye Almanê,  
Min got qey ezê çend salan biseqînim li bajarê Berlînê,  
Ez nizanim şansê mi tunebû an jî bextê min bi reş bû kê berê  
min daye Kôlinê,  
Ezê çend meha mîna dîl û êsîra ji xwe ra mame li qampa  
Durenê.  
Ax de canê canê canê canê.*

*Canê canê canê canê canê canê,  
Wî gundîyê biçûkê eman lê pîrr nezanê,  
Bê bextê bê sozê bê qîrarê bê wîjdanê,  
Serê min bi gorî umrê min bi qurbanê.....*

*Canê qurba Düren bişewite lê tev bi dare,  
Canê min got welatê xelqê ji merîfan ra nabe cîh û sitare,  
Canê emê bi hev re digerîyan serê har du mehê zivistanê heta  
li me bû bihare,  
Welle derdê min yeq bû te ye sala îsal li canê min kîr hezare.  
Ax de canê canê canê canê!...*

*Canê canê canê canê canê canê,  
Wî gundîyê biçûkê eman lê pîrr nezanê,  
Bê bextê bê sozê bê qîrarê bê wîjdanê,  
Serê min bi gorî umrê min bi heyranê.*

*Canê qurba Hukûmeta Alman berê min da bajarê  
Salzkottinê,  
Derdê min wisa pirr û giran e welle nay nîvîsandîne nay  
gotinê,  
Ezê rabim îzna cana xwe bixwazim ji dê bavê wê bidim  
qelenê wê mal û mulkê xwe yê dunê,  
Heke têra qelenê kewa min neke, ezê evî laşê xwe yê rizî  
bavêjim ber bazarê firotinê...  
ax dê canê canê canê canê.*

*Canê canê canê canê canê canê,  
Wî gundiyê biçûkê eman lê pirr nezanê,  
Bê bextê bê sozê bê qirarê bê wîjdanê,  
Serê min bi gorî umrê min bi heyranê.*

## *Çardeşeviya min*

*Vê sibê dîsa ji nişkava tu çûy te hîştim bi tenê  
Careka din xemê hundirê min zeft kîr  
Di pey te re dîsa ketim nava tenetiyê  
dîsa ketim nava tarîtiyê  
ez bûm wek cemed li hember eşqa te  
Teslim bûm bê têkoşîn û bê berxwedan  
Hemî hissên min vala bûn  
Ez bûm wek dareka hişk  
an jî wek agirek bê duman  
şewitîm şewitîm di hundirê xwe da  
bûm wek ariya agirek temirî..*

*min xwest ez serê xwe hildim û biçim  
Bi tevî van sirrên xwe yên veşartî  
Ku wek agir hundirê min diperitînin*

*Xwezî bibama bilbilekî  
min li ku gulek bidîya lîser daniye  
pêda bixwenda  
êşa birîna veşartî eşkere kîra  
Da ku bi ruh û bê ruh hemî bi derdê te bihesiyana  
Bizanibana ku ez çiqas dertê evîna te dikşînim  
Belku hinekan desmalek bidana min  
Pê rondikên çavên xwe pagij bikîm  
Lê jiber kele giriye  
Hîskîn bi min ketin  
Gotinên min di qirika min de bûn gilok  
Di şûna avek zelal de  
Bi hêsrên hat şûştin rû yê min*

*wek keştîkî xiravbûyî li ber derya mam  
bi deh salan bi sed salan li benda te bûm  
ne tu hatî û ne jî wek din  
min qotên darên rizî himêz dikîr  
dema pêlên avê ew danîn  
belkî namek ji te têda heba*

*êdî ba jî nay ku bîhna te bistînim  
an jî difnê min xitimî!  
Pêlên avê jî sekinin  
min li wan dînhêrî û pê sebra xwe danî*

*zanî gula min ez im û yek wênek te  
carnan devlîken, carnan kelogirî  
dibêm ev bû evîna min  
ku bi hezar salan li benda wê bûm  
destek dabû min, sozek wê hebû  
kanê li ku ye?*

*Dema min dengê te sehîdikîr  
An jî li nava çavên belek dînhêrî  
Dîlaneke dest pê dikîr li erdê û li esmana  
Stêrka dans dikîrin  
Ba dihat, berf diheliya  
Av radibû, dara belgên xwe vedikîr  
Jiyaneke nû dihat cîhanê  
Daristan rengo rengo dixemilî  
Çivîkan dixwendin, dar diketin silavê  
Dema tu dihatî û derbas dibûy*

*Ka çi bêjim piştî ku tu min nabînî  
Ne min, ne jî rondikêên çavên min  
Ne jî şewata dilê min  
Bûme wek qûmên sor li çolên erebistanê  
An jî wek erdê qelişî ji ber germê li deşta Herranê  
Bi qasî ku wî erdî bêriya baranê kiriye  
Ez jî ewqas hewcedarê te me Gula min  
ez wek laşekî di nava qarwanê jibîrbûyan da me  
Eşa xwe, kula xwe ez tenê his dikim  
Ji kê ra bêjim, feryad û fîzar bikim wê bizanibin gelo  
Piştî ku te ji min fêm nekir!*

*Agirê hundirê min cemeda Qutbê bakur dihelîne  
Kulîlkê berfê û hebikên zipikê  
Jiber bîhna min dihelin dibên dilopên baranê  
Dema ku ez bêriya te dikim  
dema ku êşa evina te dubare dibe*

*Roj ji min dixeyîdî  
dema min ji te re digot "roja min"  
Heyvê xwe vedişart  
Dema min ji te re digot "Çardeşeviya"  
Stêrkên li esmana teko teko vedimirîn  
Dema ez li esmana li te digeriyam  
Piştî ku tu çûy ava  
Dîsa dunya min tarî bû  
Her der bû şeva reş, şevên nîsanê*

*Zanî Gula min êdî ewr jî zaha bûn nabarin  
Jiber hêsrên min têrdîkîn*

*Dilê min peritiye lê zimanê min seqînî  
Çiqas bê çare me, ewqas jî belav bûme  
Pirr gotinên kevn hene li ser zimanê min  
Ku wan deman min ji te ra negotibû  
Niha dixwazim bêjim lê wê çi çare be?  
Belê nebêjim  
jiber tu ji min bawer nakî  
jiber tu ji min fêr nakî*

*Xwezî bibama baran min jiyan bida cîhanê  
Bikişiyama bibama leyî  
Biketima serhev bibama çem, bibama derya  
Bikeliyama li ber rojê,  
bibama duxan, bibama helm.  
Derketima esmana  
Belku nêzîktirê te dibûm,  
belkû zêdetir girêdayê bi te dimam.  
Bila ez bibama tune, boy xatirê te.  
Ji xwe ez tune me, tu heyî  
Ma çi ferqa me heye, an tu en ez  
Yek ji me herduk, herduk ji me yek nebûn?*

*Te îja zanî çima ewqas bi hêrs im  
Çima ewqas xeyidîme ji dunyayê  
te zanî ez çiqas evîndarê te me  
Lê tuyê çi dem fêr dikî gelo?*

## **Carnan**

*carnan dibî wek  
ewrê Nîsanê li esmana  
dirijînî biser min de dilopên evînê  
wek taviyê teyrokê li min diqîn  
dimînim di rehma Xwedê da*

*carnan dûûûr diqevî  
tirêjnên te wenda dibin  
di pişt heft çiyayên Qaf da  
dimînim wek eskîmo  
di Qutbê bakur de  
dicemidim bê rojê  
wek surr û zemherîra di Serhed da*

*carnan dişewitînî bi eşqa xwe  
diperite laşê min ji ber germê  
diqelişe dilê min ji tirêjnên evîne  
wek deşta Herranî di meha Tebaxê de  
li ber rojê  
dizarim jiber êşa evînê  
diqêrim wek dayikên şehîdan  
fixan dikim  
dengê min diçe erd û esmana  
ji derdê kê gelo?  
tu!..  
belê tu gula min horiya baxê Îrem  
gula çiyayê Kurdîstanê*



## Çend Şev

çend şev bûn bê xew mam  
dî xem û xeyala dîlberê de  
geh li rast û geh li çep  
zivirm dî nav nivînê de  
da te bibînim dî xeyal de  
çav vekîrî guh liser têlê  
da bibihûzim dengê nazik,  
lefzên ji nav lêvên şêrîn bêja dîla

çend car destê min çûn ser têlê  
min taqet nekîr li te bigerim  
şiyarkîm ji xewa şêrîn

geriyam ez carnan li sûka  
carnan li daristana  
çend car min himbêz kîr  
tayên fidana bi xeyala te  
min bîhn kîr gul û rihanan  
dî şûna dêmên te da

omidên çiçekên dîl  
teko teko zer bûn bi sehera sivê ra  
xeyidim ji tenêtiya tariyê  
dîlxweş nebûm bi derketina rojê  
ev ne roja min bû, qanê roja min!  
tavê da serê çiya, cîhan ruhni bû  
lê qanê tava min?  
ez hêj mame dî reşaya şevê de

## *Çû êdî nahat*

*Dîlbera-m çû êdî nahat,  
Li min name sebr û tebat,  
Kîr dilê-m agir û şewat,  
Min gellek hêsir jê-r barand!*

*Dîlber dîlber dîlberê,  
Zalimê dil kevirê,  
Bi eslê xwe koçerê,  
Ax bê bextê lê Nûrê!*

*Qeta ji yarê di vê rojê da!  
Wekî şewata di dalê da!  
Şewitandim kîrim xwelî!  
Çavê min man di rêya wê da.*

*Dîlber dîlber dîlberê,  
Zalimê dil kevirê,  
Bi eslê xwe koçerê,  
Ax bê bextê lê Nûrê!*

*Seet li min bûn wek sal e,  
Ku nay kêwa çav xezale,  
Piştî xwe da min çû gerê!  
Li min kîrî zindan male.*

*Dîlber dîlber dîlberê,  
Zalimê dil kevirê,  
Bi eslê xwe koçerê,  
Ax bê bextê lê Nûrê!*

*Canê min ciwan kal kîrî  
Nexweş xîstim bê hal kîrî  
Goşt û hestiyê-m hellandi  
Ruhê min birîndar kîrî*

## *De wer were*

*De wer were de wer were de wer were  
Kewa gozel îro li xwe kîrî fistanê sor û zer e  
Ev bê bava nizanîm çima ewqas şîrîn e qend şeker e  
Îsal çend salê min e, li hêviya te me were te ruh ji canê min  
kîrî dere*

*Îro bûme mêhvanê kewa xwe, min dî desta da elba şîr ji  
bêriyê tê di xemilî  
Ez nizanîm qîza bê bava ji kêra çav û biryê xwe kîl kîrî  
Tûncîka narîn bi ser eniya geverda li her du alîya belav kîrî  
Porê xwe şûştî guliyê dirêj girtî ji înadê min ra li nava millê  
xwe wer kîrî  
Gelî gundî malî cîrana hun gazin û loma ji min nekîn gava  
çavê min bi çavê delalîya min ket hişê min çû dil xewirî*

*De wer were de wer were de wer were  
Kewa gozel îro li xwe kîrî fistanê sor û zer e  
Ev bê bava nizanîm çima ewqas şîrîn e qend şeker e  
Îsal çand salê min e ezê li hêviya te me, were te ruh ji canê  
min kîrî dere*

*Kewa gozel Kurtik bişewite tev bi dar e  
Eşqa qoçera min sala îsal hundirê min anî xware  
Ezê ji te ra sonda tamam sond bixum tu wer cara te jibîr  
nakîm heya roja bîkêvim axasare*

## *Delala dilê min*

*Tu ji min xeyûdî îro qet xeber nadî çîma?  
Bîst û heyştê min tamam bû çavên min li rêya te ma,  
Te dilê minê nexweş tijî kirî ji kul û xema,  
Lê delala nav dilê min çî bikîm tu bawer nakî!*

*Çarşem e îro bîst û heyştê me tamam bû dîsa,  
Ne xeberek ne cewabek te neşandî ji hêrsa,  
Ez ji wek te birîndar im tu çawayî ez wisa,  
Lê xezala dilê rezîl çî bikîm tu însaf nakî*

*Bedew e ew wekî hîvê, hem wekî rojê bi nûr,  
Hiş û aqil ji bo min neman, bûme mecnûnê meşhûr,  
Evîndarê bejna te me, hem bi nêzîk hem bi dûr,  
Bê însafê dikîm nakîm, tu vê mesafê nêz nakî!*

*Te li ber çavê min reş kirîye hemî jinên cîhan,  
Meh û salan şev û rojan ji bo te dikîm fixan,  
Dixwazim ez te bibînim, tu ji min re bibî xuyan,  
Lê şepala bêbext û soz çî bêjim jî tu fêm nakî!*

## *Delalê*

*Min dilberek dit di vir da  
Wek min bi tenê di nav gawir da  
Dema berê xwe da valî  
Bi wan çavên reş awir da*

*Navê dilbera min delal e  
Bi herdu çavan wek xezal e  
Wê ji derde tenêtiyê  
Pirr got û hem jî dinale*

*Ka wer carek te bibînim  
Bejn û bala te çawa ye  
Ger bi dil-can biçbînim  
Ruh û can tevda feda ye*

## *Derdê Hêwiyê*

*Delal heyran bejna te zirav e ji dara biyê  
Ezê bi xulama bejn û bal û timtêla te zeriye  
Xelk aşiqê mal û halê dunê ez bûm aşiqê te zarokê te gundiye  
Tu dizanî va bû çen salê vî rebenî qediya ji bona te miriye  
Lê zalimê şev û rojan dizarim ji derdê te êzdiye  
Ka wer ji bona herdu dilan herçar çavan çend salan qebûl  
bikê qara vê hêwiyê*

*Gelî heval û hogiran heke hunê pirs a eslê kêwa min dikî  
kewam bi eslê xwe macire  
Xwedê xirav bikê mala dewleta romê çawa destê min û kêwa  
min ji hev qetandin ez li welatê xwîb bi tenê ew ne li vir e  
Heke hunê pirs a eşqa wê dikî eşqa zalimê di dilmin de wekî  
pêteka agire  
Gazin û loma ji min nekî, derdê min giran e birîna min pîr  
kûr e  
ez çî bikî ez bi tenê me, min hal nîne û ew zalima jî min  
dûre  
Heke hunê pirs a delala min dikî yeqa bejin bilînda nav  
qendîla çavbeleka birî qeytan e bi navê xwe menşûre*

## *Derdê Sorgulan*

*Min gulek dît li nav gula  
Dişewtîne hemî dîla  
Dimirim ji derdê van sorgula  
Çi bikîm feleka-m xayîne.*

*Gulên xelkê bi made ne  
Gula min tim devliken e  
Ruh bê qalib, cesed bê ruh  
Pirr serxweş e, ne ku dîn e*

*Mest bûme ji eşqa mehbete  
Çavan nedît lê dil ketê  
Yarên xelkê bikêf û henek  
Ya min biderd û kul û kîn e*

*Hewar ji destê eşqa dîla  
Barek giran da ser mila  
Ez dixûnim wek bilbila  
Digirîm lê ew min nabîne*

## *Derdê xwe*

*Şevbaş li te xezala min  
Tim dilxweş bî delala min  
Xelk û alem tev zewîcîn  
Ax tu nebûy bermalya min*

*Ax bextê min qedera min  
We reşkirî jiyana min  
Gava derdê xwe ez bêjim  
Nanvîsîne qelema min*

*Wey Xwedêyo ev çi derd e  
Gelo rojek wê dev ji min berde  
Min bighînin çavreşa min  
An min bîkuje wê bi ser de*

*Wey Rebbiyo ev çi jane  
Birînên minên kevn hildane  
Çavê bi çavên reş naqevin  
Dunya li min bû zîndane*

*Wey Xwedê yo ji kê bikîm gazin  
Ji te tiştên pirr naxwazim  
Pirr xedar im belengaz im  
Ji derdê rinda dest bi bazin*

*Ji bo Xecê ez Siyabend im  
Ji bo Şêrîn ez Ferhad im  
Wekî Mecnûn di çolê da  
Bi zarîn û bi feryad im*



*Wey Rebbiyo ez kerr lal im  
Dem û gavan ez diqalim  
Li zîndanan wek Memê Alan  
Ji bo Zînê ez dinalim*

*Dikim qêrîn her dem û gav  
Ez heliyam bûm av û xunav  
Çavnêrîne benda wê mam  
Ji min ra bişîne yek silav*

*Gelo carek bibînim ez  
Rînda dunê bûka Medya  
Evîndarî bi derd û kul e  
Hercî nezan nedîn dunya*

*Wey Xwedêyo ez çi bikim  
Ji kê re bêjim derd û êşê  
Kewa min çû ji xelkê ra  
Xwe da ber darê dergûşê*

*Naxwazim sehbikim dengan  
Xwe kerr bikim ji herdu guhan  
Naxwazim kesî bibînin  
Xwe qor bikim ji herdu çavan*

*Kesên evîndarî nedîn  
Bila li min loma nekîn  
Çi zanin ew jana dilan  
Bi nezani derman bikîn*

## *Derman*

*Îro ji derdê dîlberê,  
Bûme serxweş û serserî,  
Çavên belek lêb şekerê  
Tu derdê min baş dizanî*

*Rind î delal î pispor î  
Xerîb im ez tû ji min dûr î  
Wek hîv û rojê bu nûrî  
Ez dimirim lê tû çawanî*

*Koçera min delala min  
Çavên belek xezala min  
Xwezî bibay bermaliya min  
Ez çi bikîm tu nezan î*

*Rû girtina bi melesê  
Ez kîrim gula melisî  
Çima tu halê min napirsî  
Zanim ku tu bêwîjdan î*

*Min pîr got tu nakî îman  
Min got em herin tu nakî ferman  
Birîn kûre nîne derman  
Ka bê-j dermanê me kanê*

*Nîza-m çima qet pîrs nakî  
Ji bo derdê min hewes nakî  
Min ji vî xemî xîlas nakî  
Tu yî doxtora vî canî*

*Vê xurbetê li me çi kîr  
Cerg û dilê me parçe kîr  
Te li vî eşqî çare nekîr  
Ji birîna min ra tu dermanî.*

## *Dilber kanê?*

*Îro dîsa nexweş im ez  
Birîndar bûme ez îro  
Birîna min bê derman e  
Niza-m dîlber kanê îro?*

*Gelo dîlbera min kanê  
Wê dunya kîr li min fanî  
Tenê hîştîm li dewranê  
Sebir nakîm ku ez îro!*

*Yarebb Tu bide min sebrê  
Hetta roja bikevim qebrê  
Nedî wê kul û qedere  
Wê da min pîr zehmet îro.*

*Te bi dîlberê nekîr şahî  
Ji hevalan şûnva mayî  
Di nexweşxanê da paldayî  
Bi derba koçerê îro*

*Eva eşqa jibîr nabe  
Hetta ku dunya avabe  
Li vî derdî çare nabe  
Doxtorê dunê bên îro .*

## *Dilê dîn*

*Kewa gozel dilê min ji dila dilekî dîne  
Mal şewitîyê te li me derbas kîr çend zivistan û çend havîne  
Te her roj xêber dişand digot kurro lawîkê were min bi revîne  
Tuyê îro çima poşman bû yî qey tu nizanî dilê min ji te re bi  
evîne*

*Kewa gozel Xwedê xîrab bike Şerefdîn bişewite bi av û çeme  
Mal şewitîyê te ji min re sond dixwar digot kuro lawîkê ez  
ya te me  
Te çewa bext û sozê xwe danî te dilê min tijî kîr ji kul û xeme  
Ma qey hun nizanin ji birina min ra ew zalîma tenê melheme*

## *Dîna min dîna min*

*Lê lê dînê dîna min dîna min dîna min dîna min dînê  
Lê lê dînê hîne bi min hîne, dînîka min hîne bi min hîne  
Ax de te yê bi vi aqilê xwe li me derbas kir çend zivistan û  
çend havîne  
Xelk û alem bûn aşiqê bejin bilînda çav bi kîla, bisk bi têla,  
çepil dirêja, ez bûm aşiqê yeqa dîn e.  
Welle şansê min tune ji guhan kerr e min seh naqe, ji qelb û  
dilê xwe kor e min nabîne  
Ez çi bikîm feleka bêbext ji min ra xayîn e dîna min dîna min  
dîna min dînê, sebr û bîhna min dînê*

*Lê lê dînê Ameda şewitî payîtext e, Amed bişewite payîtext e  
Ax lê dînê dev ji galgala berde dem boriya nema wexte, şev  
boriya nema wexte  
Xelk û alem bûn aşiqê bejin bilînda, çav bi kîla, bisk bi têla,  
navqendîla çepildirêja, ez evdalê Xwedê bûm aşiqê yeqa ji  
aqilê xwe kême e sê-çar texte  
Ez çi bikîm şansê min tune, feleka xayîn ji min ra bêbext e,  
dîna min dîna min dîna min  
ax dîna min dînê, sebr û bîhna min dînê*

*Dîna min dîneka baş e  
Li xwe kir dêrê qumaşe  
Ez dînê çûne dalê  
Em geriyana kaş bi kaşe  
Em runîştin li nav giya  
Bi kêf henek û laqirdiya  
Bi we dîna bê aqil ra  
Dema me pîr xweş boriya*

## **Dr. got**

*Îro li doqtor bûm*

*Çendek bû pirr bê hal bûm, îro çûm Dr.*

*Ez miayene kîrim ka sedemê bê halîya min çiye?*

*Piştî filmê dr. ma ecêb, got ku tu çawa dijî?*

*Min got çima?*

*Got va cara yekem e em dibînîn ku mirovekê bê dil dijî,*

*dî nava te de dil tune ye, bê halîya te ev e!*

*Ez kenîyam min got doqtor min dil heye,*

*lê ne bi min re ye, gula min girt û bir,*

*her çiqas dûr be jî, jîyan dide laşê min,*

*wekî rojê li esmanê hefta çawa jîyanê dide alemê!*

## **Durûyê!**

*Dîlber îro min aciz kirî,  
Zalim canê min zer kirî,  
Wê qiymeta xwe ya mezin,  
Ji ber çavê min rakirî,*

*Çima tu ewqas şirîn î,  
Gelo çima min dixapînî,  
Her roj tu min di behecînî,  
Belkî tu xêrê nebînî!*

*Dev bi girî dil bi xwîn bî,  
Şahî nebîn tim bi şîn bî,  
Lîng bikîşe ji çavan qor bî,  
Muhtacê ber destê min bî.*

*Te ji vî rebenî çi xwestî?  
Bi hellî bi mînî hestî,  
Perîşan bî li vê dunê,  
Dûv re bi kevî ber vî destî*



## ***Eşqa te!***

*Ax Dîlberê te lal kîrim  
Melûl û hem bêhal kîrim  
Ji nav hevalan ez rakîrim  
Ji eşqa te bê hal im ez!*

*Bejna bilînda wek çinar,  
Cergê min kîrî birîndar,  
Dikim fişan zarîn hewar,  
Ji eşqa te bê halim ez!*

*Tenê mame ez ji dayê,  
Xerîb geriyam li dunyayê,  
Bê te sebra min qet nayê,  
Ji eşqa te bê halim ez!*

## *Eyşanê*

*Eyşan yekê rindîkê lê lê lê Eyşanê  
Bi eslê xwe jî tirkê lê lê lê Eyşanê  
Birê de diçe difirîkê lê lê lê Eyşanê  
Ji xelkê re bi şefqete lê lê lê Eyşanê  
Ji min re bi kîr û rikê lê lê lê Eyşanê*

*Ax de lê lê lê lê lê Eyşanê  
Çavreşê reşkildanê lê lê lê Eyşanê  
Biriyên wê wek qeytanê lê lê lê Eyşanê  
Ji xelkê re bi merhemet lê lê lê Eyşanê  
Ji min re bê wîjdanê lê lê lê Eyşanê*

*Sûretên wê wek sêvan lê lê lê Eyşanê  
Hingiv dibare ji devan lê lê lê Eyşanê  
Xew heramkîr li şevan lê lê lê Eyşanê  
Heyrana tenik lêvan lê lê lê Eyşanê  
Bibe bûkê ez bim zava lê lê lê Eyşanê*

*Ax de lê lê lê lê lê Eyşanê  
Çavreşê reşkildanê lê lê lê Eyşanê  
Biriyên wê wek qeytanê lê lê lê Eyşanê  
Ji xelkê re bi merhemet lê lê lê Eyşanê  
Ji min re bê wîjdanê lê lê lê Eyşanê*

## *Ez nakîm*

*Lê dîlberê dîlberê,  
Ez heyranê dîlberê,  
Delalê lêb şekerê,  
Ez qurbanê dîlberê,  
Nesekîne li wê derê,  
Ez heyranê dîlberê,  
Bê soza qîza kerê,  
Ez qurbanê dîlberê,*

*Na welle na ez nakîm  
Welle bîlle ez nakîm,  
Nexweş im ez dimirim  
Bê Ferat sebir nakîm,  
Ne mirim te digirim  
Bê te îdare nakîm,  
Li vê dunê bê mêr bim  
Bê Ferat mêra nakîm*

*Dîlber yekê bedew e,  
Evîndara min ew e,  
Bext û sozên te dan min,  
Tev derketin derewe,  
Tu axa ez kole bûm,  
Aşiqê bejna te bûm,  
Meh û salan min qar nekîr,  
Şev û rojan li bal te bûm.*

*Na welle na ez naqim  
Welle bîlle ez naqim,  
Nexweşim ez dimirim  
Bê Ferat sebir naqim,  
Nemirim te digirim  
Bê te îdare naqim,  
Li vê dunê ez bê mêr bim  
Bê Ferat mêra naqim*

*Min te dîtî li zozanê,  
Heyrana girêdanê,  
Ji herd û sûretên sor,  
Tu bide ramûsanê,  
Dikim naqim tu nayê,  
Zalimê bê wîjdanê,  
Xwedê mirazê me bike,  
Li ser îman û Qur'an'ê.*

*Na welle na ez naqim  
Welle bîlle ez naqim,  
Nexweşim ez dimirim  
Bê Ferat sebir naqim,  
Nemirim te digirim  
Bê te îdare naqim,  
Li vê dunê bê mêr bim  
Bê Ferat mêra naqim.*

## **Ez Rebenim**

*Nava gund û warê me bişewite hemî deşt û çiya,  
Serê her du mehê vê biharê minê destê dîlbera xwe girtî emê  
derketine serê rêya,  
Emê çend şeva bûne mêhvan û misafirê misliman û van  
êzdiya,  
Kula Xwedê bi kul be bikeve derê, der û cînar û gundiya,  
Çawa destê dîlbera min girtin birin, destê min û kewa gozel  
ji hev qetiya,  
Xwezî bi îman û Qur'an'ê, min dîsa delalîka dilê xwe bidîya,  
Bila Ezraîl bata ruhê min bistenda ezê bibama mirîkî ji  
miriya,  
Xema min nîne bila cenazê min biçûya deşta Mûşê nehya  
Ziyaretê kavla Xeybiya,  
Li ser cenazê min top bûna qîz û bûkê mehelê bi tevî  
jinebiya,  
Bila biketa guhê min dengê kewa gozel sertacê horiya ez  
rebenim ez rebenim...*

*Xwedê xerab bike nava gund û wara bişewite xweş caddê ye,  
Gelo nayê bîra te hemî cî û mekanê kêf henek û laqirdiyên  
min û te ye,  
Kewa gozel roja min û te xatir ji hev xwestî, min dî hêsir ji  
çavê te da nabarin êdî min dizanî li vê dunê ez bimirim jî, ji  
bone te bê faydeye,  
Ax bê bavê ezê ji te ra sûc û qebeheta nabînim, a kum sehkirî  
dibên eslî bavê te ecem e, yê diya te file ye  
Ji bavê berê da ez dizanim tu bexç û soz û qewl û qirar ji  
bona we tune ye ez rebenim ez rebenim.....*

## **Ez xapandim**

*Dîlberê ez xapandim,  
Serê rêya ez gerandim,  
Çend mehê me qedîya,  
Ewê ez şewitandim.*

*Ax dîlber dîlber dîlber!  
Dîlber çiqas delal e,  
Nizane ku Şêxo ê wê,  
Ji bo çiqas dinale?*

*Nîzanim çima derew kîr,  
Eşqa dilê min rakîr,  
Paşê piştî xwe da min,  
Malê li min xirab kîr.*

*Ax dîlber dîlber dîlber!  
Dîlber çiqas şirîn e,  
Cergê min tijî kîrî,  
Derd û kull û birîne.*

*Nav nabêjim gune ne,  
Çend nîşanên wê hene,  
Yek serê memikî ne,  
Yên din li bin çoka ne.*

*Ax dîlber dîlber dîlber!  
Dîlber çiqas zalim e,  
Dilê min tijî kîrî,  
Derd û kûl û eleme.*

## ***Fedî***

*Lolo kuro navê min Sorgul e  
Gede lawikê min wekî roja li asîmanê hefta di çilwile  
maşewitiyo wele hezkîrana te janê xîstî nava dile  
lo bêbexto êdî were min ne sebrê lo ne tehemmule*

*Lolo kuro dîsa hatî roja îdê  
gede lawikê min li welat ez li xerîbiyê li vî erdê  
maşewitiyo wele eşqa te li ruyê min nehîşt eyb û fedî  
xelkê hezkîrê xwe sitendin gihîştin mirazê xwe min gede  
lawikê xwe têr nedî*

## *Fêmnake*

*Ez çi bêjim çi beyan kîm*

*Sirrê dîlan ez iyankîm*

*Derd û xema eşkerakîm*

*Kes ji halê min fêmnake*

*Me dest da hev em çûn baxa*

*Ez kole ew mîr û axa*

*Dilê min girt da ber daxa*

*Kes ji halê min fêmnake*

*Kes nizane sirrê dîlan*

*Derdê eşqa çavxêzalan*

*Ger binalîm meh û salan*

*Kes ji halê min fêmnake*

*Aşiqê rinda Meda me*

*Evîndar im mubtela mê*

*Ger bibînim can fedame*

*Kes ji halê min fêmnake*

*Mecnun im ez li sehrayê*

*Digerim ax li Leylayê*

*Bibînim bejn û balayê*

*Kes ji halê min fêmnake*

*Li dil da tîrekî dijwar*

*Serê tîrê di dil çû xwar*

*Di kîm fixan zarîn hewar*

*Kes ji halê min fêmnake*



## *Feryad*

*Hukûmeta romê destê min û delalîka dilê min ji hev qetandî  
Min got qey wê min ji bîr bike, çend roj şûn va ji min ra  
silavek şandî  
Ewê rojê şûn va min zanîbû ewê mala min û xwe bi hev ra  
şewitandî.*

*Sala îsal ez bûm aşiqê wê keça macira  
Halê min xirab e ez bi roj bi şev digirîm çavê min xalî nabin ji  
hêsira  
Ê kû hatî serê min abdalê Xwedê bila ne ê serê hirç û gura.*

*Dîlberê te çawa terkê min kir li welatê xerîb ez hîştim bê kes  
û bê eqreba  
Hetta kengê emê wiha bin xwezî rê kî rohnî li me veba  
Xwezî bi îman û bi Qûr'an'ê bila mirin hebûya derdê dilê  
rezîl qet tuneba*

*Rêya gundê we bişewite ber bi pale  
Îro pêncê me tamam bû ez têlê li ser têlê didim keşwa min  
nayê serê nizamim keşwa min kû da çûye gelo ne li male  
Xwedê zane bê dîlbera xwe îdare nakim wellê ez nexweş im  
min ne hale*

## *Gelo*

*Te ef nakim na welle,  
Te bê hal kîrim bîlleh,  
Dema ezana melle,  
da gello têmê bîra te?*

*Gezmax û seyrana te,  
Bê lastîk hatina te,  
Hatim dest û lingên te,  
Gello têmê bîra te?*

*Ewan sondê te xwarin,  
Piştî seyrana dawîn,  
Min kîr fişan û zarîn,  
Gello têmê bîra te?*

*Ew navê te li min danî,  
Tu bi fê'lê xwe dîzanî,  
Te heya me tev hilanî,  
Gello têmê bîra te?*

*Gava derkevî eywanê,  
Li serê rê ya li seyranê,  
Dema bi kevî tîranê,  
Gello têmê bîra te?*

*Nanxwarina li ser masê,  
Çêbîkî kartol û masî,  
An jî tu yekî ramîsî,  
Gello têmê bîra te?*

## *Gul Çiye*

*Herkesek ku ji yekê hezdikê  
jê re dibê gula min,  
lê hemî derewa dikin.  
Ji xwe li cihanê yek gulek heye,  
ew jî gula min e!...  
Gulên xelkê bi rojê belgan vedikin  
lê gula min bixwe Roja delal e!..  
Ku tav û germaya wê tunebe  
gelô wê jîyan çawa bimeşe!*

## *Gula Mela*

*Nexweşî min sehkirî, lê dîlberê dîlberê  
Wê şevê-m xew nekirî, ez heyranê dîlberê  
Bese tû xema neqe! lê dîlberê dîlberê  
Te canê me zer kirî. ez heyranê dîlberê*

*Koçerê xeber da min, lê dîlberê dîlberê  
Agir berda nava min, ez heyranê dîlberê  
Sist bû çok û millê min, lê dîlberê dîlberê  
Çi jan bû da dilê min, ez heyranê dîlberê*

*Ez hatime ber derî, lê dîlberê dîlberê  
Min dî li min dinêrî, ez heyranê dîlberê  
Şev û rojan em digrîn, lê dîlberê dîlberê  
Me xelas ke lê zerî. ez heyranê dîlberê*

*Ez Ferhat tu Şirîn î, lê dîlberê dîlberê  
Tu ruh û canê min î, ez heyranê dîlberê  
Zanim tû mereq dikî, lê dîlberê dîlberê  
Dil bi kull dil birînî. ez heyranê dîlberê*

*Ez Mecnûn tu Leylayî, lê dîlberê dîlberê  
Tu gula dilê Melayî, ez heyranê dîlberê  
Çi bixwazî tu hêjayî, lê dîlberê dîlberê  
Mela ji te-r can fedayî ez heyranê dîlberê*

## *Gula min dermanê Dila*

*Îltifat nakî bi çend rojane  
gula min gula min dermanê Dila  
yek lehzeq bê te mirin û jan e  
gula min gula min dermanê Dila*

*cemala te ji min re seyrana dil e  
gula min gula min dermanê Dila  
dûrbûna te ji min re pirr derd û kul e  
gula min gula min dermanê Dila*

*wer bibe Loqman min derman bike  
an bibe cellad li qetlê ferman bike  
bibim Îsmâîlê te min qurban bike  
gula min gula min dermanê Dila*

*bi agirê hîcranê min ne şewitîne  
dîla bi axîn û nalîn û zarîne  
keremqê bi mehzûnî min nezvirîne  
gula min gula min dermanê Dila*

*çiqas xwe veşêrî ez te dibînim  
di nav dilê xwe de ez te hiltînim  
roja tunebî wê dem bi şîn im  
gula min gula min dermanê Dîla*

*pirr bûn birînên min wer bibe tebîb  
li warên xelkê min neke xerîb  
ji baxên xwe re min bike endelîb  
gula min gula min dermanê Dîla*

## *Gula Şêxo*

*Rinda çiyayê Şerefîn im,  
Ez tu kesî naxapînim,  
Sozen bidim ez pêk tînim,  
Ez gula dilê Şêxo ê dîn im.*

*Kevoq im ji deşta Mûşê,  
Bîhn xweş im weqa menekşê,  
Roja Şêxoyê xwe nebînim  
Ji ruh û canê xwe tev dêşêm.*

*Kevoqa deşta bê dar im,  
Her roj ji bo te dizarim,  
Dilê min her bi te va ye!  
Ji tirsê bavê xwe niqarim*

## *Gula min xeyîdî*

*Gula min xeyîdî ji min  
Li min bê wicdaniyê kîr  
Li ger û kêf û li dîlanê  
Tanê hîştîm li cîhanê,*

*Roja zivîrî ji gerê  
Pacê vedîke dînhêrî  
Ku mesaja dîla nebe  
Made, kîn û riq tev dibe*

*Nizan ka min çi go wilo  
Di nav xewnên wê de gelo  
Silavek nade bi riq e  
Hesreta min jibîr dike*

*Ax lê canê ax lê canê  
Te zalimê bê wicdanê  
Îro roja îniyê ye  
Rojek taybet ji bo me ye*

*De ka werê vê êvarê  
Ez qurbanê lêlê yarê  
Ku tu nebî cîhan tarî  
Wekî şeva baran barî*

*Bese bibhîze zarînê  
Şev û roj ax û nalînê*



## *Gulê çû*

*Gulê tu çûy ji nişkava  
Bê xatir û bê silava  
Liber guhê min bû gurîn  
Deng ji zalimê hat birîn*

*dimrim ji bona te Gulê  
Ev çi eşq bû te da dilê  
Ez li dora te dîgerim  
Wek bilbilê li dor gulê*

*tenê hîştim û ew jî çû  
min niqarê ku bidim dû  
Evîna te li cîhanê  
Nehîşt li min tu av û rû*

*Eva çi bû te li min kirî  
Heroj bi axîn û girî  
Gelo sûcê min çi heye  
Ji bilê min ji te hezkirî?*

*tu heyat î tu jîyan î  
ji derdê min re tu derman î  
te min kir evîndarê xwe  
çima ewqas bê îmanî*

*carnan dibî wek biharê  
car ezraîl î dikûjî  
car dibî dayikê dilsoz  
carnan vampîrê xwînmij î*

## *Gulamin gulo (Audi 4)*

*Çi dem û dewran li me bori  
Di rê û dirban de*

*Çi hevalîkî xweş bû  
Bi roj û bi şev bi te ra  
Em wek du heval bûn  
An wek du evîndara*

*Pirr xweş bû hevaliya te  
Me gellek hene bîranîn  
Li bajarên Ewropa*

*Bê bexta felekê  
Destê me ji hev qetand*

*Vê sibê cara dawîn bû  
Hevaltiya me  
Tu çu bê xatir xwestin  
Dil ma bi te ve  
Çav di rêya te de*

*Wek parçek ji laşê min qetiya  
Wek nîv mirov im di xema te de*

*Wî navê şirîn li kêşê nakim  
Dil rehet bî tu gula min  
Gulooo !..*

## *Gundiye*

*Gundiya min tê ji kaniyê,  
Bi cêr û misîn av haniye,  
Dil ketim keça gundiye,  
Çi bikim dîlbera min durû ye.*

*Gundiya min ji bêryê tê,  
Dêrê belek çî lî bejnê tê,  
Were em destê hev bigirin,  
Bi hev re biçin mala metê.*

*Bejna zirav çî kubar e,  
Ji eşqa te heyhewar e,  
Eşîr lî min bûn neyare,  
Ji dest gundiya xeddare.*

*Gundiya min tu nayê çima,  
Çavê min tim lî rê ya te ma,  
Nexweş im ez te dixwazim,  
Zer bûme wek mûm û şima*

## *Halê min bibîn*

*Ez çi biqim ji xwe û ji te,  
Te ne rehme ne şefqete,  
Dûr im niqarin bê m bal te,  
Tu wer halê-m bibîn dîlber!*

*Guliyên dirêjên bê wefa,  
Min ji xwe-r têr pê nekir sefa,  
Te ez kuştim bi sed cefa,  
Were halê-m bibîn dîlber!*

*Bê te jîna min tuneye,  
Dilê min her bi tevaye,  
Hêsrê çevan ji bo te ye,  
Were halê-m bibîn dîlber!*

*Zanim dîn im ji bona kê,  
Evîndar im ji bo çavên wê,  
Hêj ez nemirime zalimê,  
Were halê-m bibîn dîlber!*

*Ruhê min ji te re feda ye,  
Canê min qurbana te ye,  
Çavê min li rêya te ye,  
Were halê-m bibîn dîlber!*

## *Haylo li min*

*Kewa gozel îro fistanê belek li bejna xwe kîr,  
Xwe da nav derî, bi dilê şewitî li min mêze kîr,  
Xwedê zane sala îsal, min ji dîlbera xwe pirr hez kîr,  
Ez çî bikîm şansê min tune bû Xwedê Teala ji min ra nesîb  
nekîr.*

*Gelî hevala hun dizanin dîlbera min rind e, bê qisûr e,  
Heke hunê pîrsa eslê kewa min dikîjî kew min bi eslê xwe jî  
koçer e,  
Kewa gozel tu dizanî mislîman lime stariyê nakîjî were ezê  
bi destê te bigirim te birevînim, bavêjim dewletekî jî van  
dewletê gawire.*

*Koçera min tu yî ji min ra sebra dîla,  
Malşewitîyê te sing şênê jî baxçê gula,  
Qey tu nizanî kes li me stariyê naqe were ezê bi destê te  
bigirim birevînim bavêjim ber bextê fila.*

*Sala îsal ez kuştîm bûka koçera,  
Zalîma qîza zalîma ez hellandîm wek mûm û çîra,  
Were ezê dua kî bikîm tû jî bêje amîn, xwezî mêrê te bimira,  
Serê her du mehê vê pahîzê Xwedê Teala te ji min ra nesîb  
kîra.*

*Lê lê dîlber qurba êvar e, lê roj li ava,  
Ezê bi heyrana bejna bilînd çepilê dirêj ewan dev û lêva,  
Xwezî bi îman û bi Qur'an'ê bi wî roja ku ez bibînim tu bibî  
bûk ez jî bibim zava.*

## *Hêsrên Çavan*

*Ne şair û ne dengbêj im  
Te hiş birî ez kerr û gêj im  
Hêsrên ji çavên xwe dirêjim  
Hêsrê-m ji bo te dibarin*

*Ez çi bikîm ji vê heyatê  
Çi bikîm bi mal û serwetê  
Sonde dixum bi Tewratê  
Hêsrê-m ji bo te dibarin*

*Ax ax dîlberê ax macirê  
Birîndar im ji ber vê tîrê  
Sonde dixum bi Zebûrê  
Hêsrê-m ji bo te dibarin*

*Ax dîlberê çav xezalê  
Rîndê bedewê delalê  
Sonde dixum bi Încilê  
Hêsrê-m ji bo te dibarin*

*Ax koçerê bê wîjdanê  
Çawa kîm ruh û vî canî  
Sonde dixum bi Subhanê  
Hêsrê-m ji bo te dibarin*

*Ez çi bikîm bi vê dunê  
Ku bê te mame bi tenê  
Sonde dixum bi Qur'anê  
Hêsrê-m ji bo te dibarin*

*Çi derbekê bû te li min danî  
Li welatê me Kurdistanê  
Bi sê telaqê jin berdanê  
Hêsrê-m ji bo te dibarin*

## *Hewar Hewar*

*Hewar hewar Hewar hewar Hewar hewar Hewar hewar  
Mal şewitiyê te bi destê evîna xwe nexweş xistim kîrime  
birîndar*

*Xelkê ji xwe ra li vê dunê jiyaneke xweş dîtîn bi tevî  
hezkeriyên xwe û dost û yar*

*Çavê min li rêya tene tu wer cara tu der li min nakîn cîh û  
sitar*

*Te yê sala îsal nexweş xistim bi saxî kîrime axa sar*

*Hewar hewar Hewar hewar Hewar hewar Hewar hewar*

*Hewar hewar Hewar hewar Hewar hewar Hewar hewar  
Hewar hewar*

*Ez gune me*

*Eva bû serê 14-15 mehan tim bi roj û şevan li benda te me*

*Hesrea dilê min e ku rojekê bi dilê xwe rûnê me wa li cem e*

*Tu nizanî bûm aşiqê bejna bilind, çepilê dirêj nava zirav her  
du çavên bi surme me*

*Ji birnên min ra tu melhem e*

*Hewar hewar Hewar hewar Hewar hewar Hewar hewar*

*Hewar hewar Hewar hewar Hewar hewar Hewar hewar  
Hewar hewar*

*Bê lome be*

*Agirê te kiryi dilê min belku di hundurê te be*

*Wisa di dîlda bimîne tu wer cara jê kê me nebe*

*Çiqas dem zeman derbas bibe roj bi roj lê zêde be*

*Ezê dua kî bikim belku Xwedê kîlîte li devê te xe, ji min bêtir  
li tu kesî venebe*

## *Heware*

*Heware ax li mim heware!  
Min ne sibe ne êvar e!  
Hiş û aqilê min nema!  
Hundirê min hatî xware!*

*Min ne zar e ne zimane!  
Kesek derdê min nizane!  
Zarîna min çû esmane,  
Çi bikim dîlber bê wijdane!*

*Ji kê re bêjim derd û halê!  
Kulla ewê çav xezalê!  
Ji min re sozeqî dabû!  
Esîr hîştîm dam ber malê.*

*Were taqetê min nema!  
Çavê min li rê ya te ma!  
Nizanim çima bawer nakî!  
Hellîyam ez wek mûm û şîma*

*Ev çi jane da dilê min!  
Ka wê çawa be halê min!  
Erd û esman tev digirîn!  
Ku tu na ê ber çavên min!*



## *Heyla wahê*

*Mala kew a gozel li cîhkî tîk e,  
Îro ji min re bi kî n î bux z û wa bi ri k e,  
Di ber min re di ç e û tê difiri k e,  
Çepilê xwe bi ser min da dihecîne û liba di k e,  
Dev û çava di qelêşe ji min re îşaretê di k e,  
Ez nizamim va zalima îro dawa ç i li min di k e?*

*De hey la wahêêêê hey la wahêêêê hey la wahêêêê  
Dilberê qurba minê ji te re çav rijiyayêêêê  
Dikîm nakîm bê te sebra min qet nahêêêê  
Tuyê wisa dilê min da şîrînî ezê te nadîm bi kurr û qîza bi  
xuşk û bira bi bav û dayêêêê,  
Na welle te nadîm bi ruhê şîrîn û bi hemî dunyayêêêêê  
Îsal çar salê min tamam bû ez li hêvîya teme a x zalimê  
dîlgawirê tu çima na êêêêê?*

*Min nizan bû derdê dilê rezîl ewqas zor e,  
Minê ji te re son da tamam sond xwariye ku ez terk a te nekîm  
hetta ku umrê min tev bi bore,  
Eger hûnê pirs a eslê kew a min dikî n, kew a min bi eslê xwe  
koçere,  
Navê delîk a dilê min Meşhûr e !*

*De hey la wahêêêê hey la wahêêêê hey la wahêêêê  
Dilberê qurba minê ji te re çav rijiyayêêêê  
Dikîm nakîm bê te sebra min qet nahêêêê.....  
Nakar at*

## *Hîma ewqas bû?*

*Hîma ewqas bû evîna te  
bi yek firtonek wêran dibû?  
tu nebûy ya ta mirinê bi evîn bay ?  
bi çend gotin û bi rêwîtîkî diqediya?*

*bi qasî erdê giran, bi qasî esman fireh bû eşqa me  
ka qiyamet raba neditemirî çira me  
ka ronaya min. Çû ava roja min, dîsa mam di tarîtiyê de*

*ez azad bûm bi te gulê, bi azadî dijîm bi evînê  
kîjan bextereş li zincîrê dixê eşqa me?  
kî ye li qeydê dixê dilê min  
evîna min mezintirê ji qeyd û benda ne!*

*ne bo demek bû ne jî macerak bû  
ne kêfxweşî û ne jî dilxweşî bû evîna min  
belkî eşqa herî mezin e  
wek rojê gurr dibe ronaya wê bi agirê xwe!  
min ronî kîr eşqa te  
bi ehda min ya ezel an bi mirin an bi zindî  
tu ya min bî gula min*

*tu zendîkî ku bitemirê agirê di dîlda bi yek derewek!  
tu ruhek bûy di laşê minê rizî da  
min serîkî heye di vê rê da  
an dimrim an jî digrim te Gula min*

## *Jarî (Yar bûye jarî)*

*Digerim nabînim yara min li ku ye?  
Kes ji min napirse halê min çiye?  
Dimirim ji derdê wê kewê durûye,  
Xew li min heram e roja min bû jarî.*

*Nabînim dîlberê halê min pîrr xîrab!  
Daye min îsal wê hezar û yek ezab,  
Vî Nûro yê reben Tu xîlaskî ya Rabb!  
Vexwarin heram e, xwarin bûye jarî,*

*Min rê ya xwe şaş kîr digerim nabînim,  
Min bawer kîr ji wê gelo qey ez dîn im?  
Naşîne silavekî ku ez hilînim!  
Digrîm bi halê xwe hêsrê-m bûne jarî.*

*Min navê perîşan bim ez wekî cara,  
Min pîrr kîşand ji destê van dost û yara,  
Wê çawa be halê dîlberîndara?  
Naxwazim bila ney yar bûye jarî!*

## *Keça çavreş*

*Tu ji min dixeyîdî çima?  
Gerek tû ji min ne kê loma,  
Çi kêrî te bi min kêrî!  
Te ez kêrim esîre roma.*

*Ji te hez dikim dîzanî!  
Lewra ewqas bê wîjdanî,  
Êdî taqetê min nema,  
Tu ji min ra qidûmê çokanî.*

*Welleh ji te pîrr hez dikim,  
Nîqarim terkê te bikim,  
Rojê lî ber çavê min nebî,  
Dikim dunê xirab bikim.*

*Serê rêya ketim û dimeşim,  
Ji bo koçera xwe ne xweş im,  
Xelk aşiqê malê dunê  
Ez kolê bûkê çavreş im.*

## *Kewa min*

*Kewa min çav belek e,  
Bese derdê min gelek e!  
Dema ku diçim balê,  
Cerg û dilê min kul dike.*

*Gava jê dûr dikevim,  
Teze bi xwe dihesê,  
Êdî bi desta naqevim,  
Dil bi kul û merez e.*

*Dixwazim dilber rast be,  
Ji derd û kulan xilas be,  
Ku bibe bermalîya min,  
Wê ji min re pirr bi naz be.*

*Dilbera min esmer e  
Eşqa wê wek agir e  
Bext û soz wê virr e  
Bê bextê zû dizvire*

*Bide min bext û soze  
Ku ez bi te bawer bim  
Bibin xwedan yek doze  
Ji te re can feda bim*

*Dilberê çav ne lidere  
Bi eslê xwe koçere  
Ji min ra gelek dûre  
Bi navê xwe Menşûre*

## *Keyf û henek*

*Dîlber qurba dilê min û dilê betê eman eman  
Xwezî par vî wextî me bi destê hevdu digirt, em bihevra  
diçûn taxa jêrîn mala metê eman eman  
Sala îsal tu çawa poşman bûyî, ez perîşan im ji ber sozê te bê  
bextê eman eman  
Ax zalimê ya ku te pê girtî yê min û te çû heya roja qiyametê  
eman eman*

*Delal qurba tê bîra te ez û tû em bi hev ra diçûn goma jêrîn  
eman eman  
Tu yê bi derewa dixeyîdî diçûy, min lavê te dikir, dikir zarîn  
eman eman  
Ax bê bavê ka sûcê min ji te ra çîye te yê sala îsal ez birîndar  
kirim, kirim mîna peza gura xwarî eman eman*

*Mal şewitîyê te çima ewê şevê ez nexweş xistim kirim nava  
ciya eman eman  
Ez rûniştim wekî zarokan ji xwe ra digiriyam eman eman  
Te yê laçîk dabû ber devê xwe, tu ji xwe re bi dizî bi min  
dikêniya eman eman  
Bala xwe bidinê qîza bê bava dibê kuro lawikê min nizanbû,  
ku tu yê wisa ji bo min dişewitî û di helliya eman eman*

*Koçera min ka wê rojê min ji te ra çî got ku tu xeyîdî eman  
eman  
Ji ber eşqa te li vê dunê li rûyê min nema şerm û fedî eman  
eman  
Ezê li ser danzde dewletê Eurupa yê digiriyam min yekê  
mîna delalîka dilê xwe zalim tê da nedî eman eman.*

## KOÇERÊ

*Ji Mûsilê çûm Bexda yê,  
Serê min ketî belayê,  
Min koçereq bedew dît,  
Birîndar kîr li dinyayê.*

*Min ji koçera xwe hez kîr,  
Xelkê ji xwe ra girt û bir,  
Me ji hev du re sozek da,  
Wê piştî xwe bi min da kîr.*

*Bejna koçerê zirav e,  
Ji min re pîrr bêbav e,  
Bume mêhvanê koçerê,  
Min dî dî şûşt berave.*

*Ax xurbetê tu xirab bî,  
Tu car tu ji min re nabî,  
Dibê ezê bi te ra birevim,  
Destê min ji zara nabî.*

*Me dan hevdu bext û soz,  
Em bun xwedanê yek doz,  
Roja destê me ji hev bû,  
Ewê sozê xwe kîrî toz.*

## *Kolê te me*

*Rûyê Mûşê girtî ewr û mije eman  
Dijminê zalim xwîna kewê min dimije eman  
Ji destê vî zalimî kewê min xwîn vedîreşe  
Ez kolê te me emrê xwe bêje eman eman eman.*

*Dîlbera min wekî roja li esman e eman  
Çi bikim ketiye destê yekê zalimê nezane eman  
Dil bi kul çav bi hêsir stûxwar û perîşan e eman  
Destê min naqîhîjê ji min re derdekî giran e eman eman eman*

*Rînda dunê tu ezîza li ber dilay î eman  
Te wek rojê li esmana rohnî dayî eman  
Tu taca zêrîn li serê melayi yî eman  
Çi bikim îro destê dijmin da esîr mayî eman eman eman.*

*Kewê min bese negrî ne lorîne eman  
Hêsrên bi ser sûretên sor û sipî da nebarîne eman  
Te dilê min tijî kîr derd û kul û birîne eman  
Birîndarê te me were halê min bibîne eman eman eman*

*Ya Reş va derdê han çi derdek zor e eman  
Destê min naqîhîjê ji min re gelek dûr e eman  
Ez horî û melekê cennetê naqxwazim eman  
Derdê dilê rezîl ew Menşûr e eman eman eman*



## *Kumreşi*

*Cuwanî bar kîr ji wara  
Dil tije ji kul û kedera  
Esir mame li nav neyara  
Ji evîna keça koçera.*

*Du demê wê nabine yek  
Carnan li min dîde tîrek  
Cerg kul dike xwîn dirêje  
Ku silav nede min carek*

*Ku bi xelkê ra xeber bide  
Agir dilê min da dadîde  
Dikim ji kerba xwe bi kujim  
Wek marê reş bi min vedîde*

*Wê birîndar kîrim çend car  
Nasekîne li yek girar  
Bese bi min neleyîze  
Bite vedim ez wekî mar*

*Rînda dinê zalima Kurd  
Hiş û aqil ji min tev girt  
Ez dîn kîrim berdam çolê  
Umrê minê mayî kîr kurt*

## *Lê Zozanê*

*Lê Zozanê lê Zozanê  
Serê mêra bi qurbanê  
Were em destê hev bigirin  
Xwe bavêjin Kurdistanê*

*Zozan hat û xwe libakîr  
Hiş û aqlê- bir wunda kîr  
Min got carek te bibînim  
Gelo çima xwe li min takîr*

*Lê Zozanê lê Zozanê  
Serê mêra bi qurbanê  
Were em destê hev bigirin  
Xwe bavêjin Kurdistanê*

*Çav û birîyê Zozê reş in  
Xeberdan û zarê wê xweş in  
Kî Zozanê bi çavan dît  
Bi ruh û canê xwe nexweş in*

*Lê Zozanê lê Zozanê  
Sere mêra bi qurbanê  
Were em destê hev bigirin  
Xwe bavêjin Kurdistanê*

## *Li ku ye?*

*Çûm ku xêber jê bistînim,  
Hinek derd û xema deynim,  
Min pîrr bakîr wê deng nekîr,  
Ji bo wê ye îro ez dîn im.*

*Saet yanzdê beriya nîvro,  
Dema xêberdana her ro,  
Niza-m îro li ku maye,  
Kûçik bavê lê lê Seyro!*

*Îro çendê me tamam bû,  
Em bi hev du pîrr guman bûn,  
Berê me pîrr xêber dida,  
Du deng ji me ra nîşan bû.*

*Wê nîşana xwe ji bîr kirî,  
Hiş û aqlê-m pê ra birî,  
Îro roja suhbeta me  
Ne li male çû mala jêrîn.*

*Min bêrîkîrî pîrr gelek,  
Ez heyrana çavên belek,  
Peznê wê ez ji we ra nadim,  
Delal e wek horî melek.*

## *Macirê*

*Ji Mûsilê çûm Bexda yê,  
Serê min ketî belayê,  
Min macireka bedew dît,  
Nexweş xistim li dinyayê.*

*Min ji macira xwe hez kir,  
Xelkê ji xwe ra girt û bir,  
Me ji hevdu ra sozeke da,  
Wê piştê xwe bi min da kir.*

*Bejna macirê zirav e,  
Ji min ra pîr bêbav e,  
Bume mêhvanê macirê,  
Min dî dişûşt berave.*

*Ax xurbetê tu xirab bî,  
Tu car tu ji min re nabî,  
Dibê ezê bi te ra birevim,  
Destê min ji zaroka nabî.*

*Me dan hevdu bexî û soz,  
Em bun xwedanê yek doz,  
Roja destê me ji hev bû,  
Ewê sozê xwe kirî toz.*

## *Mêvana ezîz*

*Min sehkir  
wê mêhvana ezîz kerem ke,  
bê koşkê belek muşeref ke,  
lê ditirsin ku koşkê neecibîne!*

*Dixwazim hemî jînên Cîhanê jê ra  
têkim qewraş,  
hemî mêrê dunê jê ra  
têkim xîzmetkar,*

*xalîya raşim li ber lingên mêvanê  
û serjêkim jê ra qûrbane.*

*Geriyam xîzmetkar tunîne  
û kêsekî li mal nîne,  
sivnik jî tune ku der dora paqij kim  
guliyên min tune ku jêkim  
têkim sivnik,*

*Avê kaniya miçiqîbûn,  
min hesrên xwe barandin  
pê cî û nivîne mêvanê şuşt û zaha kir*

*bi van dest û tiliyên nazik,  
her derê koşkê belek,  
heya kûlîn, serşo û tuwaletê jî paqijkir,*

*da ku mêvana mina  
ezîz aciz nebe û kêfxweş be!*

Geriyam min xalî nedît,  
raxîm lî ber lingê mêvanê,  
lê min şûnê da qebûl kir  
ser û çavane,  
geriyam min pez nedît têkîm qûrban,  
lê min xwe ji bonê amade kir.

Da ku mêvana mina eziz  
bê qûrban û  
bê xalî neyê koşka belek,

Ling bide ser ser û çawên min  
û min tekê qurban ji xwe re

û bi xwîna min binivîse  
lîser dîwara:  
„Ez hêjame bi sed hezara  
Qûrbanên wek te“

Ez pîr man lî hêyîva mêvanê  
bi deh mehane,

hêsrê min miçiqîn  
xwîna min qedîya,  
goşt û hestiyê min helîya,  
kêra min jeng girt û riziya,

dîsa mêvana mina eziz  
nahat û çavê min man lî rêya!...

## *Min dîl ketê*

*Ax dîlberê lê lê lê ax qoçerê way way  
Te qelb işkê lê lê lê dîl gawirê way way  
Çav belekê lê lê lê lêb şekerê way way  
Kê dîl ketê lê lê lê dîl bû kerî way way*

*Bejna narîn lê lê lê wek fidane way way  
Guliyên dirêj lê lê lê li nav milane way way  
Çav û biriya lê lê lê reş kildane way way  
Kê dîl ketê lê lê lê hiş nemane way way*

*Bejna Nûrê lê lê lê çi dirêj e way way  
Reng û sîma lê lê lê ji xwe kej e way way  
Ka wer sozek lê lê lê ji min re bêje way way  
Kê dîl ketê lê lê lê kerr û gêj e way way*

*Çav û biriyê lê lê lê wê ciqas reş in way way  
Bi rê da diçe lê lê lê hûr dîmeşi way way  
Çewa-m dît çû lê lê lê aqil û hişe way way  
Min dîl ketê lê lê lê bûm nexweş e way way*

*Bejna zirav lê lê lê çi narîn e way way  
Negrî hêsrân lê lê lê nebarîne way way  
Te li min çêkîr lê lê lê kul-birîne way way  
Te Mela kîr lê lê lê har û dîne way way*

## *Min xem nîne*

*qehra felekê heye di hemi hewesên min da  
hezlar lezzet tam dikim ku dengê te belav be  
di guhê min da  
ew navê te yê şêrîn bêjim di nefesa xwe ya dawîn da  
paşê bimrim min xem nîne Gula min!*

*evîndarê çavên te me ku du kevînan liser xwar û mêl da  
evîna te sohtim hesreta dûriyê wek şûrek ma di dîlda  
xwezî balgîkî bama li bin serê te  
min nefesên te têr bîhn bikîra paşê bimrama  
min xem nîne Gula min!*

*qetîm evîna cemala te ku li cîhanê bê emsalî  
ji horiyên cennetê ra li cîhanê tu mîsalî  
xwezî loqek xwarin bama li ber dîdanê te yên mercan  
parçe parçe bibim dakevim nava te  
paşê bimrim min xem nîne Gula min*

*xwezî min carek di sehkirî ew dengê te yê nazîkî xweş  
wek perwanê li ber cemala rûyê te bigeriyama  
bihelîyama liber agirê eşqa te bibim tune jiber tirêjnen rojê  
di wan çavên belek da  
paşê bimrim min xem nîne Gula min*



## *Min nezanê*

*De wer lo kuro lawiķo mingo hanê bi min hanê  
Mal şewitiyo dilê min gola behra Wanê  
Eydî erefat e xelkê bi destên dost û yarên xwe girtin  
derketine kêf û seyrânê  
Ez ebdala Xwedê ji xwe re bi tenê mame li quncê malê*

*Bi dilê şewitî derketim ber derê min pala xwe da stûna  
dîwanê  
Kuro malşewitiyo bidî xatirê Xwedê Pêxembera û Qur'anê  
Were destê min bigire birevîn bavêje çiyayê Şengal û Zaxo,  
Kurtik û Şerefdînê welatê şêrîn Kurdistanê  
Qey tu nizanî mal xirabo li welatê xerîb çi hatiye serê min  
biçûkê, min gundiye min nezanê*

## NAKİM

*Lê dîlberê dîlberê,  
Ez heyranê dîlberê,  
Delalê lêb şekerê,  
Ez qurbanê dîlberê,*

*Neseqîne li wê derê,  
Ez heyranê dîlberê,  
Bê soza qîza kerê,  
Ez qurbanê dîlberê,*

*Na welle na ez nakîm,  
Welle bîlle ez nakîm,  
Nexweş im ez dimirim,  
Bê Ferat sebir nakîm,*

*Ne mirim te digirim,  
Bê te îdare nakîm,  
Li vê dunê bê mêr bim,  
Bê Ferat mêra nakîm*

*Dîlber yeqa bedew e,  
Evîndara min ew e,  
Bext û sozên wê dan min,  
Tev derketin derewe,*

*Tu axa ez qole bûm,  
Aşiqê bejna te bûm,  
Meh û salan min qar nekîr,  
Şev û rojan li bal te bûm.*

*Na welle na ez nakim,  
Welle bîlle ez nakim,  
Nexweşim ez dimirim,  
Bê Ferat sebir nakim,*

*Nemirim te digirim,  
Bê te îdare nakim,  
Li vê dunê ez bê mêr bim,  
Bê Ferat mêra nakim*

*Min te dîtî li zozanê,  
Heyrana girêdanê,  
Ji herd û sûretên sor,  
Tu bide ramûsanê,*

*Dikim nakim tu nayê,  
Zalimê bê wîjdanê,  
Xwedê mirazê me bike,  
Li ser îman û Qur'an'ê.*

*Na welle na ez nakim,  
Welle bîlle ez nakim,  
Nexweşim ez dimirim,  
Bê Ferat sebir nakim,*

*Nemirim Te digirim,  
Bê te îdare nakim,  
Li vê dunê bê mêr bim,  
Bê Ferat mêra nakim.*

## *Navê te û evîndarî*

*navê te û evînî  
evîn tu yî roja min  
bê te evînî  
bê evînî te nafiķirim  
roja min tu dîtî  
evîna xwe naskîrî  
tîrêjnên rojê didîn  
pace û derî  
yên te didîn dilê min  
jiyan bê rojê nabe  
dîl bê te bê ruh dibe  
nazîka min  
kî dixaze bê ruh bijî?*

## *Navê te ye*

*navê te ye evîna min  
evîn jixwe tu bi xwe yî  
roja ku min ji te hezkîrî  
evîna xwe jî naskîrî*

*îro du roj mam bitenê  
gula min çûye seyranê  
bête nameşe dilbêrê  
de ka were bê wîcdanê*

*carnan dengê xwe dibirî  
dikujî vî pîremêrî  
zanî tu ne bitenê evînê  
belku ruh û canê min î*

*dengê te ji guhê min qut be  
qiyameta min radibe  
de ka were xezala min  
li benda te me delala min*

*şevên bê te pîrr dirêj in  
ji çavan xwînê dirêjin  
nikarim ez tev bibêjim*

*tu meqsedam baş dizanî  
çiqas xwedan derd û êş bim  
ji birînên min re tu dermanî*

## *Naym Bîngolê*

*Keşa gozel minê ji te ra sonda tamam sond xwarîye ezê tu wer cara ji Xarpêtê naym Bîngolê....*

*lê mala minê.*

*Mal şewitîyê qey tu nizanî dilê min naşwaze li kêleka qotiyê pîsî heramê nemerdî mêra, ez bibînim lê te çav xezalê....*

*lê mala minê..*

*Kula Xwedê bi kul be bikeve derê qotiyê mêra çewa keşa gozel daye ber şkencê, keşa min ji destî vî kuçikê heram nexweş ketî nava ciya, jar û zêf bûye, bûye wek qamîşê lê devê golê...*

*lê mala minê....*

*Dilber qurba tuyê bidî xatirê Xwedê û Pêxembera îdî bese tu negrî û ne lorîne, hêsrana bi ser suretû sor û sipî da nebarine, ez bi qurban bese êdî xema neke lê tu menalê lê mala minê....*

*Lê lê dilber qurba qey tu nizanî ezê bûm aşiqê te sala par vî çaxî li welatê xerîb serê herdû mehê zivistane lê li Botanê...*

*lê mala minê...*

*Ez nizamim tu îro çima poşman bûye te bextû sozê xwe tev danî..*

*lê mala minê.....*

*Ezê ji te re sonda tamam sond bixum bi sê sondê qesemê piştî çav û birîyên reş û belek bejna zirav li vê dunya rezîl tu wer cara ez nagerînim lê vî ruh û canî....*

*lê mala minê.....*

*Mal şewitîye qey tu nizanî li welatê xerîb kesê min tune ezê  
bi ser da bigirîm, ezê ji bo xatirê bejna bilind çav û birîyên reş  
û belek digirîm li çokê xwe dixim dikim nakim tu nayê rê, ax  
zalimê nizam çima tu wisa ax lê bê wîjdanî!...  
lê mala minê.....*

*Lê lê kêwa gozel mal şewitîyê îro li welatê xerîb ez ji kêwa  
kewî ribat im....*

*lê mala minê.....*

*Mal şewitîyê qey nay bîra te sala par vî çaxî li welatê xerîb  
serê her du mehê zivistanê ez û kêwa gozel rastî havdû  
hatin...*

*lê mala minê.....*

*Delal qurba eva bû serê sezde çarde meha, teyê çiqas cara  
digot kuro lawikê were, ezê serê rê û dirba diketim lê ez  
dihatim....*

*lê mala minê..*

*Mal şewitîyê ez nizanîm tu yê îro çima poşman buyî, teyê  
bext û sozê danî, Xwedê zane ji destê kêwa gozel ez  
nexweşim lê bê tebat im.....*

*lê mala minê...*

## *Nedîtina te*

*Evîna min nedîtina te  
Ji min ra pirr pirr dijwar e  
Stûxwar û şerpeze kîrim  
Bûm sêwiyê ber dîware*

*Dûr ketim ji çavên belek  
Ji wan guliyên wek tîremare  
Jiyan ji bo herkesi xweş e  
Lê ji bo min axa sar e*

*Bejna bilind wekî sîpan  
Ji lêvan kewser dibare  
Nabe? carek bose bidî  
Ji wan dêmên wek hinare*

*Xwezî carek min bidiya  
Bida qelen xwîna sore  
Bê ala rengîn li bana  
Jiyan bo min çiqas zore*



## *Nûrê*

*Îro ji derdê durûyê, .....Nûrê  
Dilê min birîn bûye, ...Nûrê  
Şev û rojan bê halîm, ...Nûrê  
Dizanî bi min çi bûye. ..Nûrê*

*Hey Nûr hey Nûr hey Nûrê Nûrê  
Ez heyranê Menşûrê Nûrê*

*Ku çend caran min te dî ...Nûrê  
Min ji te tu xêr nedî, ...Nûrê  
Dilê min da şirînî, ...Nûrê  
Wek rojê şu'le didî. ...Nûrê*

*Hey Nûr hey Nûr hey Nûrê Nûrê  
Ez heyranê Menşûrê Nûrê*

*Eva bû çend carê te, ...Nûrê  
Hatim dest û lingê te, ...Nûrê  
Min got aşiqê te me, ...Nûrê  
Dimirim ji boy çavên te. ...Nûrê*

*Hey Nûr hey Nûr hey Nûrê Nûrê  
Ez heyranê Menşûrê Nûrê*

*Sozên didî derew e,  
Gotina min ji te re ev e,  
Eger ji min hez dikî,  
Mirinê bide ber çave.*

*Hey Nûr hey Nûr hey Nûrê Nûrê  
Ez heyranê Menşûrê Nûrê*

*Nura min bê qirar e,  
Geh doste geh neyar e,  
Ji eşqa te dîn û har im,  
Dikim zarîn heware!*

*Hey Nûr hey Nûr hey Nûrê Nûrê  
Ez heyranê Menşûrê Nûrê*

## **Oy Esmerê**

*Esmerê tu koçer î*

*Wekî rojê bi nûrî*

*Destê min nagîje te*

*Çi bikîm tu jî min dûr î*

*Oy oy oy oy esmerê*

*Zalimê dil gawirê*

*Te ez kîrim aşiqê xwe*

*Pişt da min mam li nîvê rê*

*Dîlberek bê emsalî*

*Nizanim jî bo çî dînalî*

*Çavê min man li rê ya te*

*Ji min re nabî bermalî*

*Oy oy oy oy esmerê*

*Zalimê dilgawirê*

*Te ez kîrim aşiqê xwe*

*Pişt da min mam li nîvê rê*

*Esmera min narîn e*

*Serî li min digêrîne*

*Bext û sozê xwe danî*

*Dilê min kîr birîn e*

*Oy oy oy oy esmerê*

*Zalimê dilgawirê*

*Te ez kîrim aşiqê xwe*

*Pişt da min mam li nîvê rê*

*Ser tacê dîlberanî  
Ezîza li ber dilanî  
Bûm kole û esîrê te  
Ji min ra bê wîcdanî  
Oy oy oy oy esmerê  
Zalimê dilgawirê  
Te ez kîrim aşiqê xwe  
Pişt da min mam li nîvî rê*

*Esmerê tu çi bê bext î  
Soz da min par vî wextî  
Salek li pey xwe gerandim  
Ji sozê xwe re bê hurmetî  
Oy oy oy oy esmerê  
Zalimê dilgawirê  
Te ez kîrim aşiqê xwe  
Pişt da min mam li nîvî rê*

## ***Por dirêjê***

*Ax lê Nûrê lê Nûrê Nûrê..... lê Nûrê Nûrê lê Nûra min  
Bejin ziravê lê te çav reşê.....lê porr dirêjê dîlbera min  
Te bê sozê lê bê qerarê ..... lê bê wîjdanê koçera min  
Te ez nexweş xîstim perîşan kîrim lê xîrab kîrî lê mala min*

*Ez û Nûra xwe lê çûne wara..... ..lê Nûrê Nûrê lê Nûra min  
Me kêf henek kîr lê bin zinara.....lê porr dirêjê dîlbera min  
Dengê Nûra min çû cinara ..... .. lê Nûrê Nûrê lê Nûra min  
Bavê zalîm lêxîst bi dara .....lê porr dirêjê dîlbera min*

*Min û Nûra xwe laqirdî kîr.....lê Nurê Nûrê lê Nûra min  
Der û cinar li me guhdarî kîr .....lê porr dirêjê dîlbera min  
Cîranî pîs lê fesadî kîr ..... ..lê Nûrê Nûrê lê Nûra min  
Bavê wê lêxîst bi yekalî kîr .. .....lê porr dirêjê dîlbera min*

*Nûra min ziravek narîn e.....lê Nûrê Nûrê lê Nûra min  
Digirî ji bo min dîlorîne.....lê porr dirêjê dîlbera min  
Her roj ji min re silav dişîne..... ..lê Nure Nurê lê Nûra min  
Dibê were lê min birevîne.....lê porr dirêjê dîlbera min*

*Ez û Nûra xwe lê çune sukê.....lê Nurê Nurê lê Nûra min  
Me bazar kîr lê xêlya bukê.....lê porr dirêjê dîlbera min  
Nurê dibê bi te ra direvim.....lê Nurê Nurê lê Nûra min  
Destê min nabe lo ji zarûkê.....lê porr dirêjê dîlbera min*

## **Poşman im**

*Dilber qurba ciyê min dûr e lê lê ez te nabînim lêêê ez te nabînim,*

*Tîra eşqa te da dilê min, sala îsal lê lê ez har û dîn im lêêê ez har û dîn im,*

*Tu dizanî ez bi hesreta te me, ez niqarim werim, tuyê bibe teyreş bifire were lêêê ez te bibînim lêêê ez te bibînim.*

*Dilber qurba ji min re nebêje tu kâl î, lê lê ez ter û can im lê ez terr û can im,*

*Min gelek cara qelbê te şikandî lê lê ez poşman im lêê ez poşman im,*

*Ji bo xatirê kêwa gozel, ezê bi serê rê û dirba diqetîm ez nexweşim lêêê ez perîşan im lêêê ez perîşan im.*

*Dilber qurba ez çi bikîm lê lê bê fayde ye lê bê fayde ye,*

*Bê te mala min xirabe ye sebr û tebata lêêêê min tune ye lêêê min tune ye,*

*Mal şewitîyê ez niqarim werim tuyê firdê were, tu dizanî çavên min jî lêêê li rê ya te ye lêê li rê ya te ye.*

## *Qîza kerê*

*Gelo çawa tê ji bîr kîrin,  
Derdê ewî şeva tarî,  
Dellê ji min re înad kîrî,  
Di ber mêrê xwe da xwe dirêj kîrî,  
Ax dîlberê ax dîlberê,  
Te bîhn xweşê gula zerê,  
Qîze min bi te çi kîriye?  
Min dîkujî qîza kerê!*

*Di kêve paxîla kero,  
Têda hêka dipijîne,  
Dema ku ez qebûl nekîm,  
Her du çavê dirijîne.  
Ax dîlberê ax dîlberê!  
Bejin rindê gula zerê,  
Sucê min ji te re çi heye?  
Min di xapînê qîza kerê!*

*Qîza kerê ji min hez dike!  
Belê mêrê xwe himêz dike,  
Newêrim dev bidim deva,  
Dev û çenê min gez dike!  
Ax dîlberê ax dîlberê!  
Te bîhn xweşê gula zerê,  
Qîzê min bi te çi kîriye?  
Min dîkujî qîza kerê!  
Hin mirtib hatibûn gund, mêrik û hezkîriya xwe pevcûn, ji  
wê gazin dikîr, min jî gotinên wî wek helbest nivîsîn.*

## *Rînda min*

*Rînda min keça koçera  
Xistim halê birîndara  
Kîrim esîrê neyara  
Stûxwar mam li ber dîwara.*

*Rînda min keçek macir e,  
Bi qiymete wekî zêr e,  
Biroj destê min digire  
Bi şev ji bavê xwe newêre*

*Rînda min keça badîkî  
Çima ewqas xwe liba dîkî,  
Ji min re wisa bi kîn û rikî  
Cerg û dilê min kul dîkî.*

*Rînda min keça dewazî  
Bi qurban bin muftî û qazî  
Her roj dikim fixan gazî  
Gelo çima ewqas bi nazî*



## *Şevên Dirêj*

*şevên zivistana  
şevên dirêj  
tarî  
şevên kerr û lal  
demên xemgîniyê ne  
ku dûr bi ji yarê!*

*dîsa roja min çû ava  
dîsa mam di taritiyê da  
mam tenê di derd û xeman da*

*tîrêjnên tavê didin dilê min  
ew in ronahiya şevên tarî  
di xem û xeyala rojê de*

*min navê te kirîye tizbî  
dikşînim libo libo  
bi her dayîna nefesekê  
wek zikrê sofîyan  
ya ew ya ew dibê dilê min*

*tu razê gula min  
ez nobetdarê evîne me  
ta roja min derê  
biçirîne taritiya şevê  
min bike nav baxçê gula  
bi qurbana te bit dila*

## *Şevêk*

*Îşev şeva şayokê  
min xwe dirêj kir  
lî ser dîwaneke  
tu ketî bîra min  
û xew nakeve çavên min.*

*Derva sar e  
baran dibare  
wek derdê min  
bi cêran tê xware.*

*Cîh ne tu cî ye  
ne doşek û ne lihêf  
û ne balgî ye.*

*Ez digirim nabînim  
wan zendên te yên badayî  
ji xwe re têkim balgî  
wan guliyên te yên dirêj  
wekim  
ji dilê xwe re şekim  
lî ser xwe belavkim  
têkim lehêf.*

*Cî û nivînê qirêj  
van şevên tarî û dirêj  
têda dibim sewda û gêj.*

*Newêrim razêm*

tu têy xewna min  
ji tirsaxew naqevê çavên min  
lê tu li kuyî?  
Li cem kê?

Tu dizanî  
ez bê te ne tişt im  
tu çûy te ez bê ruh  
hîştim.

Tu têy ber çavên min  
ez dibînim  
destê xwe dirêj dikim  
lê naqevî nava destê min  
digirîm hêsir ji çavan dibarin  
mendîla xwe dirêj dikî  
çi bikim bi mendîlê  
te dixwazim dîne lêê!

Tu yî cîh û warê min  
tu yî stara min  
wekî pêtekî agirî  
ketî hundurê min  
tu yî qidûmê çokan  
tu yî ronahiya çavan

tu wekî xwîne  
di rehên min da digerî  
ez dizanim tu yê rojekî  
li min vegerî!

Tî mam  
birçî mam  
tazî mam  
bê cixare û bê xew mam  
lê min terqa te nekir  
tu revî  
min sebir kir.

Seet çarê sibê ye tu razê  
ez diqim gazî  
çi ferqa me heye?  
Tu baş be  
kêfa te xweş be  
yê min tişt nabe

ji xwe ez ne zêde me  
belkî perçek ji canê te me  
sed car bi qasî xwe mezin bim  
wek bizmara  
bin sola te me!

Lê tu pîrr nezanî  
tuyê rojekî qedrê min bizanî!

bê te şevek jî  
lî min derbas bû  
bi axîn û bi nalîn û bigirî  
lê te heft xewn dîtî  
bê min şevek jî  
derbas kirî!...

## *Silav*

*Ax qoçerê ax zalimê  
Dikîştînim derd û elemê  
Ji bo xatirê çavên belek  
Ez razîme bi mirinê*

*Barî barana biharê  
Hezar silav li wê yarê  
Xwedê heqîya min baniya  
Li ser çoka te qoçerê*

*Nîkarim ez tev bibêjim  
Çerg û dilê xwe bipêjim  
Tu derdê min baş dîzanî  
Bê însafê ka ez çi bêjim*

## *Eman lê Sosinê*

*Eman eman eman eman eman eman eman eman lê sosinê  
Mal şewitîyê tû yê bi rêketî ji deşta Mûşê ez ji Mersînê  
Emê derketine zozana me yê kônê xwe vegirtî li serê çiyayê  
Şerefdînê  
Heyla mala bavê te xirab be, teyê sala îsal mala min xirab kîr  
hundirê min anî xwarê ez vedireşim ji av û xwînê*

*Hela dêna xwe bidînê çav û biriyên Sosina min çiqas reş in  
Kewam dema bi rê da diçe çepilê xwe liba dikê hûrik hûrik  
xweş dimeşe  
Rojê delalîka dilê xwe nebînim an jî dengê wê sehnekîm ez  
wê rojê pirr nexweş im  
Ji ber eşqa kêwa gozel mîna însanê şerabê vexwe, bist û çar  
saeta ez serxweş im*

*Heylawayê heylawayê heylawayê lê li min mame bê hêviyê  
Mal şewitîyê ez dîmirim ji derdê te zalimê te nezanê te  
gûndiyê  
Ezê bi xulama bejn û bal û timtêl û girêdana te zeriye  
Tû yê were ji bo xatirê dilê rezil min bistîne qebûl bike qara  
vê hêwiye*

*Le lê sosinê ezê navê te nabêjim bi delalî gazi dikîm dibêim lê  
lê Gulê  
Tê bîra te em bi hev ra çûn devê behrê rûniştin li hemberî  
Hilton Otêlê  
Emê ji xwe ra ketin kêf û heneqa, min dît sola te ji lingê te  
da ketî golê  
Mal şewitîyê eger tûyê bi min ra rastî were destê xwe li nava  
destê min xe, ezê te birevînim bavêjim kambaxa bajarê  
Stenbolê....*

## *Tê ber çavan*

*Roja biçime pîknîkê,  
Bi tenê bigerim li sûkê,  
An bibînim zava û bûkê,  
Dîlbera min tê ber çavan.*

*Xwe dirêjkim li ser dîwanê,  
An jî ku biçim seyranê,  
Dema bibînim tîranê,  
Dîlbera min tê ber çavan.*

*Ku deng bê ji telefonê,  
Birçî bim bixum xwarinê,  
Li ber bayê li ber baranê,  
Dîlbera min tê ber çavan.*

*Rûnê m li ser qoltixekî,  
Ramîsim destê şexekî,  
Bibînim axa û kolekî,  
Dîlbera min tê ber çavan.*

*Ku vala biçe keda min,  
Tarî be reşbe oda min  
Bêşê bi îsotê mîda min,  
Dîlbera min tê ber çavan.*



## ***Tê bîra min!***

*Bibînim bejneka zirav,  
Ku çepilê xwe liba bike,  
Xwîna min dibe wekî av,  
Ku koçera min tê bîra min.*

*Bibînim cotek birîyê reş,  
Bi rê da biçê hûr hûr bimeş,  
Bê hal dibim, dibim nexweş,  
Ku Koçera min tê bîra min.*

*Ku yek hêsrana bibarîne,  
An jî yek silava bişîne,  
Yek ji yekî re bêje dîn e,  
Koçera min tê bîra min.*

*Bêxêberdan behsa dîla,  
Yek gulîya bavê ser mîla,  
An bikevim nav baxçê gula,  
Koçera min tê bîra min.*

*Carek bibînim keştîyê,  
An hinek biçin bêriyê,  
Yek ji yekê ra bêj gundîyê,  
Koçera min tê bîra min.*

## *Tenêti*

*Dema dil bişewite  
xemgîn bibe  
mirov nikare  
bi tu awakî bîne ziman  
tenê ew hêsrên  
ji çavan dibarin  
aha ewan hêsrana  
dibîn hubir  
hurik hurik dinvîsînin  
xemgîniya dil  
vedîşêrîn di arşîva  
evîne da  
ku li dor mirov  
bi hezaran qes hebin jî  
dîsa mirov tenê ye  
dema hezkîriya mirov  
ne li cem mirov be*

## *Tu napirsi*

*Min ne bav e ne birane,  
Min ne kêse ne xwedane,  
Birînên min tev hildane,  
Tu çima halê min napirsi?*

*Tu radizê ez hîşyar im,  
Ez belengaz im birîndar im,  
Ji eşqa te pîrr xedar im,  
Tu çima halê min napirsi?*

*Nexweş im min hal tunîne,  
Cerg û dîl safî birîn e,  
Her jê dikşin av û xwîne,  
Tu çima halê min napirsi?*

*Bes! Tu bibêje Nuredîn,  
Te nû kirin hemî birîn,  
Ji bona wê dîlbera zalim,  
Cerg û dîlê te bûne xwîn,*

*Cerg û dîlê min bûne xwîn,  
Tu çima halê min napirsi?*

## *Tu şîrîn î*

*Tu şîrîn î wek şekîrî,  
Îro ji min re tel kirî,  
Ku dengê wê ket guhê min,  
Min dît ji bo min digirî.*

*Got êdî îdara min nabe,  
Birîn kûr e derman nabe,  
Heya qiyameta min rabe,  
Eşqa te ji dilê min dernabe.*

*Navê kurê xwe li min kirî,  
Her roj bi wî navî digirî,  
Kêlek dêşê xwîn ji poza tê,  
Wê kezeva min kir kerî.*

## *Wax liminê*

*Dîlber qurba ji Amedê heya vira,  
Minê desta kêwa gozel girtî, emê gav bi gav digeriyan li serê  
dar û bera,  
Kula Xwedê bi kul be bikeve derê van gawira,  
Çawa destê dîlbera min girtin birin, min sêwî û sitûxwar  
hîştin li ber dîwara,  
Kêwa gozel Xwedê di zane gava dilê merifa di yekê da hebe  
meriv nade bi bav û bira bi qîz û kura.*

*Dîlber qurba ez rûniştîme li devê behrê li binê siya dara bîyê,  
Tu yê satila bavê millê xwe wekî cara xwe libaşe were here  
vê bêrîyê,  
Ezê destê te bigirim birevînin bavêjim dewletek ji dewletê  
europayê kambaxa Îtalyê  
Emê rûnên bihevra bikin kêf henek û laqirdiya wekî xortanî  
li ser gemiyê,  
Kêwa gozel xelk aşiqê mal û mulkê dunê ez bûm aşiqê te  
nezanê te gûndiyê,  
Ax bê bavê ezê ji te ra sonda temam son bixum, berfa welatê  
me Serhedê dikeve erdê şeş meha ji erdê ranabe, bikeve nava  
dilê min ebdalî Xwedê, tu wer cara dilê min sar nabe ji te  
zerîyê.*

## *Wek hîvê*

*Tu wek hîva seven nîvsayî  
di pişti ewranda  
carnan derdîkevî  
carnan xwe vedîşêrî*

*ez wek mirovek  
rêya xwe wendakîrî  
di şevên tarî di daristananda  
dema te dibînim rêya min ruhnî dibe  
dîfîkîrim ku siba min hat  
roj wê derkeve  
dema xwe vedîşêrî  
careka din wenda dibim  
di taritiya şeva reşda  
bi hesreta te wek darek  
ji daristana şewîtî  
bi hissên evîndarî ya te  
rojên min wek şevên tari ne  
dihelim wek berfa li ber tavê  
ji ber awirên çavên belek  
di van rojên bi sîrr û serma yên  
wek zivîstana çilê Serhedê*

## *Were bê bexto*

*Kuro lawikî hîne bi min hîne  
Bihar e were em xwe bavêjin Kurdîstana rengîne  
Dêna xwe bidê xemilîye bi mêrg û çîmen û gul û sosin û çav  
kanîne  
Malşewito îsal çarsal e derbekî li min xistî, derdê min giran e  
hundurê min birîn e  
Eva sê mehê min tamam bû li ser doxtora digirim çarekê ji  
birîna min ra nabînin  
Ji min ra dibêjin dermanê birîna te şêxo yê dîn e  
Îro çilê min tamam bû li koşê nexweşxana radizêm, bê bexto  
bese dek û dolaba li serê min negerîne  
Ji xwe re rêya nebîne  
Tu dizanê çavê min li rêya te ye, de neseqîne lezke were lo  
min bibîne*

*De lo lawikî navê min Nûr e malşewitiyo navê min Nûr e  
Bejna min bilînd e, çavê min reş in, porrê min dirêj e, sûretê  
min ê sor û sipî wekî roja li asîmanê hefta bi şewq û şu'le û  
nûr e  
Îsal çar salê me teman bû, te yê derbekî li bedena min xistî ez  
nizanim derba xencerê an jî derba şûr e  
Na na welle teyê derbekî li serê dilê min daye, derdê min  
giran e birîna min kûr e  
Malşewitiyo eva çilê min teman bû li koşê nexweşxana  
radizêm, heyla bala xwe bidinê bê bextê min dek û dolaba li  
serê min digerîne ji xwe re rê ya dibîne, dibêje keçikê ez  
niqarim bêm rê ya min dûr e.*

## *De were lê Koçerê*

*De were lêêêê de were lêêêê de were lêêêê lê koçerê,  
Ezê bi xûlama bejn û bal û timtêl û girêdana te dîlberê  
Lê koçerê ava behrê bi şewite leme leme  
Min dît kewê min sekîni li devê avê, çûme rûniştîme wa li  
ceme,*

*Minê destê xwe kîrî taxîma sîng û berê dîlbera xwe, min dît  
memikê delala min wekî cotek kewê gozel serî bilind kîrine  
berî dane hevdu bi hev ra dixwînin ez nîzanim bi erebî an  
eceme,*

*Na wellê mîna sêvek ji sêvê Xelatê an jî porteqalek ji  
porteqalê Mersînê hêşîn dibe li qanbaxa Çûqûrovayê li devê  
çem e,*

*Ewê destên min digirt wêda dikir digot lawikê heval û  
hogirê me li me dînhêrin malşewitîyo te ne eybe te ne şerme.  
Minê dikir gazî gelî heval û hogira hun li qisûra min  
nenhêrin hun dizanin ez aşiq û kole ê kewê xwe me,  
Lê lê dîlber min ji te ra sonda tamam sond xwariye heya umrê  
min bibe sed û yek sal, tuwer cara terqa çav û biriyên belek,  
bejna zirav nakim, timî cara ez li hêvîya te me.*

*De were lêêêê de were lêêêê de were lêêêê lê koçerê!  
Ezê bi xûlama bejn û bal û timtêl û girêdana te dîlberê.*



*Dîlber heyran ezê bi delalî gazî diqim dibê m hela wîrda were  
 lê lê Xanê  
 Ez û kêwa gozel rastî hev dû hatin serê her du mehê  
 zivistanê,  
 Bala xwe didimê sûretên wê sor bûne nizamim ji serma an ji  
 ramûsanê,  
 Memikê wê xal ketinê teze hatine hiyamê vê mizdanê,  
 Minê bi desta girtî, em geriyane li bajarekî biçûk li  
 Kurdistanê,  
 Ji boy telefonê em hinek rûniştine li hêşîya postexanê,  
 Emê bi hev re ketin gilî û gazin û gotin û xêberdanê,  
 Minê jê re derdê dilê rezîl digot ewê bawer nekîr, min jê re  
 sonda tamam sond xwariye bi sê telaqê jin berdanê,  
 Tuwer cara terqa çav û birîyê reş û belek nakim, hetta li ser  
 teneşo yê çenê min bîn girêdanê.*

*Dilber qurba were em xwe bavêjin ser ziyareta Weysel-qeranî  
 disekîne li nava Bitlîs û Batmanê,  
 Heke tu qebûl nakî em xwe bavêjin ser gorra Mela Hesênê  
 Kurdmeydanê  
 Na na welle emê xwe bavêjin nehya ziyaretê kavla Xaziya  
 ser meqbera Şêx Mehmed Emîn Şehîdê Kurdistanê  
 Emê duaqî bikî belkî Xwedê bigedîne mirazê mirazxwaza  
 yê min û te jî li ser îmanê*

*De were lêêêê de were lêêêê de were lêêêê lê koçerê  
 Ezê bi xulama bejn û bal û timtêl û girêdana te dîlberê.*

## *Were lê lê*

*Îro dîsa qetiyam ji yarê  
Ji ber eşqa kêwa gozel ez roj bi roj di hellim wek berfa biharê  
Delal qurbq roja ku min û te ji hev xatir xwestî dilê min  
şewitî, kêla min rabû, hêsrê min hatin xwarê were lê lê lêêêê  
were lê lê lêêê!*

*Birîndarê te me lêêêê  
Nexweşê destê te me lêêêê  
Aşiqê bejn û bala te me lêêêê  
Îsal çar salê min e ez li hêviya te me lêêêê  
Bê bextê bê sozê bê qirarê tu çima nayê? De were lêêêê de  
were lê lêêêê!*

*Min sehkirî dilbera min îro ji min ra selamekî şandî  
Ji ber eşqa min û kêwa gozel hemî derya avê xwe miçiqandin  
dara belgên xwe weşandî  
Ax zalimê sala îsal te ez har û din kîrim berdame çolê, welle  
te kezeva min perritandî were lê lê lêêêê were lê lê lêêêê*

*Birîndarê te me lêêêê  
Nexweşê destê te me lêêêê  
Aşiqê bejn û bala te me lêêêê  
Îsal çar salê mine ezê li hêviya te me lêêêê  
Bê bextê bê sozê bê qirarê tû çima nayê de were lêêêê de were  
lê lêêêê*

*Dûlber qûrba îro panzdê meha Gulanê  
Min sehkirî kewê min ne xweşe, ez çûme ji bonê, pê ra ketim  
gilî û gazine û gotin û xebirdanê  
Mal şewitîyê were ezê dûa bikim tû jî bêje amîn, belkî Xwedê  
mirazê miraxwaza biqedîne yê min û te jî serê her du mehê  
vê pahîzê li ser îmanê*

*were lê lê lêêê were lê lê lêêê  
Birîndarê te me lêêê  
Nexweşê destê te me lêêê  
Aşiqe çav û bîrîyê te me lêêê  
Îsal çar salê mine ezê li hêvîya te me lêêê  
Bê bextê bê sozê bê qirarê tû çima na ê de were lêê de were lê  
lêêê*

## *Xaniyê Nûrê*

*Xaniyê Nûra min li cîhkî tîk e,  
Serê Nura min bi kofîke,  
Eşqa li dilê min fêm nake,  
Dilê melê xwe kul dike.*

*Xaniyê Nura min fireh ye,  
Nura min tê da paldaye,  
Nura min bi dunê hêja ye,  
Ew gula dilê melê xwe ye.*

*Xaniyê Nura min deh ode ne,  
Nura min wek taqa reyhan e,  
Kes qiymeta wê nizane,  
Ew taca serê mela ne.*

*Xaniyê Nura min du qat e,  
Nura min tê da bê rûmet e,  
Dûr im nikarim bêm ba te,  
Li min nema sebr û tebat e.*

*Xaniyê Nura min mezin e,  
Jê derketin cotek jine,  
Ewa kînik ji min re nabe,  
Zirava dirêj yara min e.*

## *Xatir xwestî*

*Îro dîsa qetiyam ji yarê,  
Helîyam wek berfa biharê,  
Me xatir xwest ji hev li Karê,  
Hêsrê min jorda hatin xwarê.*

*Vê cara han pîrr delal bû,  
Wek rojê bi şewq û şemal bû,  
Şans tune bû min têr nedî,  
Lewra ew kûçuk li mal bû.*

*Dîlber dilê min şewitandî,  
Nav û cergê min perritandî,  
Dema min xatir jê xwestî,  
Giriya pê re dest hejandî.*

*Nîza-m ji bo te çi bikîm,  
Çavên xwe ji te ra qor kîm,  
Ruhê xwe ji te re feda kîm,  
Canê xwe qurbana te kîm,*

*Dîlbera min koçera min,  
Ax zalîmê were bal min,  
Way ez ketim sekeratê,  
Rûnê tu bike şîna min.*

## *Min xem nîne*

*Qehra felekê heye  
di hemî hewesên min da  
hezar lezzet tam dikim  
ku dengê te belav be  
di guhên min da  
ew navê te yê şêrîn bêjim  
di nefesa xwe ya dawîn da  
paşê bimrim min xem nîne  
Gula min!*

*evîndarê çavên te me  
ku du kevînan liser xwar û mêl da  
evîna te sohtim  
hesreta dûriyê wek şûrek ma di dîlda  
xwezî balgîkî bama li bin serê te  
min nefesên te têr bîhm bikîra  
paşê bimrama min xem nîne  
Gula min!*

*ketim evîna cemala te  
ku li cîhanê bê emsal î  
ji horiyên cennetê re  
li cîhanê tu mîsal î  
xwezî loqek xwarin bama  
li ber didanê te yên mercan  
parçe parçe bibim dakevim nava te  
paşê bimrim min xem nîne*

## *Gula min*

*xwezî min carek din sehkira  
ew dengê te yê nazikî xweş  
wek perwanê li ber cemala  
rûyê te bigeriyama  
bihelîyama liber agirê eşqa te  
bibim tune jiber tirêjnen rojê  
di wan çavên belek da  
paşê bimrim min xem nîne  
Gula min*

## *Xewnek*

*Minê ji xwe ra xewnek dibû di xewê da dilber! Dilber! eman dilber!*

*Min dît ez û kewê gozel rastî hevdu dihatin li cîkî xerîb di nav derî da,*

*Ez û delalîka dilê xwe em bi hev şah bûn di xewnê da,*

*Gava min çavê xwe ji kewê şêrîn vekir min dît ez birîndar im wekî hirça di çolê da,*

*Ê ku hatî serê min rebenê Xwedê bila neyê serê dijminê min di vê dunê da,*

*Çend roj şunva ez derketim ber derî min dît kewê min hûrik hûrik di meşê wa tê ji wêda,*

*Ewê demê min zanîbû ezê aşiq û perîşan bim di vê rêda dilber! dilber!. eman dilbeeeeer!*

*Heywax li min heywax li min tu dizanî,*

*Kewê gozel tu çiqas zalimî ewqas bê îmanî,*

*Tuwer cara dilê te bi mirov naşewite, min nizanî tu wisa bê wîjdanî,*

*Te sala îsal mala min xirab kir, umrê min talan kir konê min ji nava kona rakir, te ez nexweş xistim kirim nava ciya te ruh ji canê min deranî*

*Wa ez dimirim ji bona çavên belek bejna bilînd ax dilgawirê tu nizamim çawani?*

*Dilber qurba koça me bi rê ket dikîşîya dilber! Dilber!....eman dilber!*

*Ez nizamim bextê min bû an jî bextê delalîka dilê min bû li tu cîyê neseqînî xweş meşîya,*



Dema li me dibû êvar koça me sekinî minê ji kêwa gozel ra  
 konekî wegirtî ji konê mûya,  
 Meyê bi destê hevdu girtî emê rûniştine li hêşîya devîya,  
 Emê bi hev ra ketin gilî gazin û kêf henek û laqirdiya  
 Ezê bi hesreta çend salan çûme dest û rû ya,  
 Min lava wê kir heta şeva me derbas bû heval û hogirê me li  
 me tov bûn dicivîyan,  
 Min got dilberê were wa neke destê xwe li nava destê min  
 bixê ez te birevînim bavêjim deşta Mûşê nehya Ziyaretê  
 Kavla Xeybiya  
 Kula Xwedê bi kul be, biqêve derê heval û hogir û der û cînar  
 û gundiya  
 Çawa fesadîka xwe kirin dilê kêwa gozel ji min hiştin dilê  
 wê êşîya  
 Malşewitîyê îsal çar sal e ez li benda te me, çavên min li rêya  
 te qetîya,  
 Ji ber eşqa te goştê canê min helliya  
 Hestiyên min riziya were dilber! Dilber...eman dilber!

Heywax li min heywax li min tu dizanî,  
 Kêwa gozel tu çiqas zalimî ewqas bê îmanî,  
 Tuwer cara dilê te bi mirov naşewite, min nizanî tu wisa bê  
 wîjdanî,  
 Te sala îsal mala min xirab kir, umrê min talan kir konê min  
 ji nava kona rakir, te ez nexweş xistim kirim nava ciya te  
 ruh ji canê min deranî  
 Wa ez dîmirim ji bona çavên belek bejna bilind ax dilgawirê  
 tu nizanî çawani?

## *Xeyîdîm,*

*Îro ji dîlberê xeyîdîm,  
Ji xêberdanê wê enidîm,  
Wek agir di şewitîm ji bonê,  
Niha ji eşqa wê cemidîm.*

*Ev çi êş û ev çi jan e?  
Ku li min bûne peydane,  
Ji cem min rabû çû odê,  
Bûm stûxwar û perîşan e.*

*Min jê re got wê fêm nekîr,  
Disa bi kûçîk ra henek kîr,  
Ji înadê min re serî şûştî,  
Gulîya bi ser xwe da belavkîr.*

*Gundiya cahil nezan e!  
Sozek da min bi derewane,  
Ez çar salan li hêviya wê mam,  
Wê soz bi avê da berdane.*

*Derdê wê derdekî giran,  
Xapandim dest ji min berdan,  
Edî nikarim bikşînim!  
Dunya li min bûye wêran.*

## *Xezal ay xezal*

*Xezal ay xezal xezal ay xezal xezal ay xezal de lê tu xezal î,  
Îro çendê min e li te dîgerim te nabînim tu ku va çûy lê ne li  
malî,*

*Ez dizanim tu jî wek min ji dilê xwe va birîndar î, de lê lê  
kûr dinalî,*

*Xezal ay xezal xezal ay xezal xezal ay xezal de lê lê tu  
xezalî.*

*Xezal qurba ez dîn nebûm lê lê te ez dîn kîrim,  
Tê ez kîrim wekî Mecnûn li serê rê û dirba ez rast kîrim,  
Di nav heval û hogiran da sala îsal ez şelpeze û şîvar kîrim,  
Xezal ay xezal xezal ay xezal xezal ay xezal de lê tu xezalî.*

*Lê xezalê birîndarê te me şev û rojan dikim zarîn,  
Birîna min bê derman e, bê te xew nakim lê şevên tarî,  
Îsal çar salê min qedîya ez li hêvîya te me, îdî bese were te  
ruh ji canê min deranî,  
Xezal ay xezal xezal ay xezal xezal ay xezal de lê tu xezalî.*

## *Xezalek*

*Min xezal dît li zozanê  
Bejin wek takî reyhanê  
Pirr gerriyam wek wê min nedî  
Ne li Cîhan , ne li Kurdistanê*

*Bejna xezalê bilind e,  
Bedew e hem gelek rind e,  
Nizanim gula dilê kê ye,  
Ew kevoqa li nav gund e.*

*Xezalê da min awire,  
Berda dilê min agire,  
Sozên dan min hemî vir e,  
Xezala min dil gawir e.*

*Xezala min tu çoçer î  
Nizanim ezep an bi mêt î  
Ez dizanim ji min hez dikî  
Gelo ji tirsê kê newêrî*

## *Yek nefes*

*Xatir xwestina ji dilberê  
ne wek mirina dê û bav e  
Ku em mecbur bin biçin jî  
tu wext destem ji te nabe*

*Dengê te yê xweş nayê min  
Gelo awazê ji bo te bes e?  
Ku sed salan li te binhêrim  
Ji bona min yek nefes e!*

## *Zîna min*

*Di tirsim ku jê dûrkevim  
Carek dîn çav pê nekevim  
Destê min û wê ji hev bi qete  
Ezê dîn bim bi çola kevim*

*Wekî berê jê hez dikim  
Çi bikim destê min da nîne  
Naxwazim xayîni pê kîm  
Dilê min jê ra bi evîne*

*Tu xecê ez Siyabend im  
Ez te bi hemî dunê nadim  
Ku wê zîna xwe nestînim  
Li vê dunê bê mirad im*

*Ez Mem im lê tu jî Zîn î  
Tu ji min ra gelek şirîn î  
Tîştê ji bo te nekîm nîne  
Tu yê bi çavên xwe bibînî!*

## *Ez Xulam*

*Bêrvana min çû bêriyê, elbê darîn di mil da  
Silav neda û nenhêrî, miraz hîştî di dil da  
Bi wê bejna bilind meşî, gav fireh avêt û çû  
Wekî mara bi min geztî, dil ma di xem û kul da*

*Xezala Şengal û Cûdî, ji lêvan şeqir dibarin  
Hingivê şana mîsal in, di guh da zêr guhar in  
Kamera zîvîn li pişt e, dil girîftdar xedar im  
Herçî kesên ku wê ditin, nexweş in birîndar in*

*Qêrîn ji min çûne felek, ta heft qatê asîman  
Ez bi lez rabûm, ji ber wê kevokê şahî cîhan  
Ku bi destan bigirim carek, bi hurmet bikîm selam  
Min bi bexşîne! Razîme bibim kole û xulam!*

*Lê guh neda min got ka ez yar bim ji kê ra  
Çima şerr nakîn li hember dijmin hûn wekî şêra  
Ez ne Dîlbera we me! Li rûyên we nanhêrim  
Heya ku dil û esîr bim li bin lingên neyara*

*Ez im bûka rojhilata navîn, ez im Kurdistan  
Bihîştê rûyê zemîn im, ez im gul û Gulîstan  
Ez ne yara we me heyra ku hun min azad bikî  
Ji dijminê rezîl ra bikî gorr û gorrîstan!*

## **Îd e îro**

*Îd e îro ji roja, roja hîjdê Nîsanê ,  
Her kesî destê yarê xwe girtin û çûn seyranê,  
Ez tenê mehrûm û dûr im, mame li vê esîrxanê  
Heya kengê wiha bimînim bi hesreta Kurdistanê*

*Min ne îde, min ne îne, min ne şeve, min ne roje,  
Ax dibêjim ji ber xurbetê, ji her du çavan xwîn dirije,  
Nizanim xeta yê min çi ne felek,roj bi roj min dûr davêje,  
Xelk bi welatê min şabe ez birîndar bim bi hîcranê.*

*Dil bi kul kezeb bi xwîn im, çav bi hêsir dev bi girî,  
Derdê dunê bi min da dibarin wek baranê li min vekirî,  
Ax xurbetê idî bese te can û cîger tev zer kirî,  
Hetta kengê emê wiha bê weten bin li Cîhanê !*

*Ji bav û bira dost û yarê ez bûm cûda  
Felekê birîndar kîrim darbe li ser darbê dîda,  
Perîşan im li cîhanê hêviya min maye Xweda,  
Ku gelê me hîşyar bibe rabe ji bo serhildanê.*



## *Newroz û bihar e*

*Birano rabin Newroz û bihare  
Dilê bi xwîn nexweş e birîndare  
Welatê min dilê li bin destê neyare  
Dilê min parçe bû, bû pare pare*

*Welatê-min kanê bê zozan û war im  
Dixûnim kewribatê ser zinar im  
Li qada xurbetê bêwelatî mam  
Dilbixwîn im dikim zarîn heware*

*Kanê welatê min warê min kanê  
Kanê Serheda min Ameda min kanê  
Wekî leyi ji çavan xwîn dikîşe  
Gula min dilê dijminê xwînware*

*Bê kes im kes li çara min nayê  
Bê Gula xwe ez çi bikim dunyayê  
Agirê evînê sohitim sersala me hat  
Ev çi derde birîn kûr e xedar e*

*Bihare xulîn ketiye çem û ava  
Sersal û Newroz hat ser ser û çava  
Li benda me ye fire bavêjin gava  
Li Kurdistanê zarîn û fizar e*

## *Seroq dizane*

*Ji min nepirsin ez kî me  
Ez nizanim Seroq dizane  
Ez azad im an bendê me  
Ez nizanim Seroq dizane*

*Çiqas qedir bilind zat e  
Ji hinkar pût, ji hinkar lat e  
Çi namûs e çi welat e  
Ez nizanim Seroq dizane*

*Bi bejn û bal ez çiqas im  
Bi pêlav im an pêxwas im  
Tirsonek im an mêrxas im  
Ez nizanim Seroq dizane*

*Em li benda soza wî ne  
Em qole yên doza wî ne  
Kî berxê ber qoza wî ne  
Ez nizanim Seroq dizane*

Çavên min tim wî bîne  
Gelo çi ewqas şîrîne  
Kî bimire kî bimîne  
Ez nizanim Serok dizane

Serokê-m bedel dunyayê  
Bê wî azadî qet nayê  
Em guh bidîn kî sedayê  
Ez nizanim Serok dizane

Ez golik im an jî berx im  
Tîşteki bixum û nexûm  
Dîlan bigrim an li xwe xim  
Ez nizanim Serok dizane

Ez ne kerr û ne jî gêj im  
Ne mamosta ne dengbêj im  
Li ku rûnê çî bibêjim  
Ez nizanim Serok dizane

## *Şeyx dizane*

*Min teslîm kîrî îradê  
Bi qurban kîr bav û dadê  
Çi bêjim jî kes guh nadê  
Ez nizanim Şeyx dizane*

*Sofitî tişteke pîrî xweş e  
Keştiya min wa dimeşe  
Li herdu cîhan kî rûreş e  
Ez nizanim Şeyx dizane*

*Însan çî ye heywan çî ye  
Gotin çî ye peyman çî ye  
Înkar çî ye îman çî ye  
Ez nizanim Şeyx dizane*

*Qet xîrav nabe ara me  
Baştir dizane kîra me  
Çi helal e çî heram e  
Ez nizanim Şeyx dizane*

Şêxê min şeyxek bi nav e  
Bê şêxê me jiyan nabe  
Azadî baş e xîrav e  
Ez nizanim Şeyx dizane

Şêxê-m emirke radibim  
Bi wî şênî û şa dibim  
Bi çî serxweş û har dibim  
Ez nizanim Şeyx dizane

Em li benda soza wî ne  
Em qole yên doza wî ne  
Kî berxê ber qoza wî ne  
Ez nizanim Şeyx dizane

## *Nexweş*

*Mela nexweş li nav ciya  
Zarokên wî lê civiya  
Deri vebû ji nişkava  
Dijmin ketî nav deriya*

*Dikeliya wekî agir  
Dijmin girtin ji ciya rakîr  
Bi hevra destên wî girtin  
Li ereba dijmin sarkîr*

*Desta girtin bikêf birin  
Herdu desta kelepçe kîrin  
Hun nizanin çi kêf dikîrin  
Gotin me melê kurda girtin*

*Kîrin şikencek pîrr mezin  
Ji zulma wan erd dilerzin  
Nizanin ku idî çi-b kîn  
Wek kûçîka me digezin*

*Dijmin bi nav misilman e  
Lê wan ne dîn ne îmane  
Bi her çar ling û deva digirin  
Di ewtin wekî tulan e*

## *Tu me îslah bikî!*

*Ya Rabbî ez gunehkar im  
Ji vî exlaqî bêzar im  
Perîşan im tobakar im  
Tu min îslah bikî ya Rabb*

*Li toba xwe nabûm xwedî  
Li hember Te dikim fedî  
Bê Te min dostek rast nedî  
Tu min îslah bikî ya Rabb!*

*Dijmin her roj me dikujî  
Her dem xwîna me dimijî  
Kurdistan her bi Îslam dijî  
Tu me îslah bikî ya Rabb!*

*Em li rûyê vê Cîhanê  
Azad bikin Kurdistanê  
Deynin ser hukmê Qur'an'ê  
Tu me îslah bikî ya Rabb!*

*Hêza me hêza Îslamê  
Her kes lê bike selamê  
Ev e netîca kêlamê  
Tu me îslah bikî ya Rabb*

